

萬 有 文 庫

第 二 集 七 百 種

王 雲 五 主 編

宋 詩 紀 事

(三十)

厲 鶚 馬 日 瑄 輯

商 務 印 書 館 發 行

宋詩紀事

(三十)

厲鶚馬日琯輯

國學基本叢書

萬有文庫

第二集七百種

王雲五

商務印書館發行

宋詩紀事卷八十六

錢唐厲鶚輯

錢唐周京勘定

錢俶

俶字文德。吳越武肅王鏐孫。文穆王元瓘子。大將胡進思等廢忠遜王侁立之。建隆元年授天下兵馬大元帥。太平興國三年詔俶來朝。納土歸京師。封許王。徙封鄧王。薨。追封秦國王。謚忠懿。有詩數百首。號政本集。

宮中作

廊廡周遭翠幙遮。禁林深處絕喧譁。界開日影憐窗紙。穿破苔痕惡筍芽。西第晚宜供露茗。小池寒欲結冰花。謝公未是深沈量。猶把輸贏局上誇。汝帖。

李煜

煜字重光。初名從嘉。南唐元宗李璟第六子。諸兄早亡。以次爲嗣。在僞位十有五年。歸宋。封違命侯。授左千牛衛上將軍。太宗登極。改封隴西公。太平興國三年薨。追封吳王。以王禮葬洛京之北邙山。有集。

五朝故事。李後主時。建康市中染肆之旁。多題曰天水碧。尋而皇家蕩平之。悉前兆也。天水碧。因煜之內人染碧。夕露于中庭。爲露所染。其色特好。遂名之。

石林燕語。太祖嘗因曲宴。使煜誦其得意詩。遂舉詠扇揖讓。月在手。動搖風滿懷。以對太祖曰。好一箇翰林學士。

西清詩話。藝祖言。李煜若以作詩工夫治國事。豈爲吾慮也。

送鄧王二十弟牧宣城

且維輕舸更遲遲。別酒重傾惜解攜。浩浪侵愁光蕩漾。亂山凝恨色高低。君馳檣楫情何極。我凭闌干日向西。咫尺烟江幾多地。不須懷抱重淒淒。

馬令南唐書。王名從益。出鎮宣州。後主率近臣。饒綺霞閣賦詩。自爲序。其略云。秋山滴翠。暮靄澄空。愛公此行。暢乎遐覽。

漁父詞

浪花有意千里雪。桃花無言一隊春。一壺酒。一竿鱗。世上如儂有幾人。
一棹春風一葉舟。一輪繭縷一輕鉤。花滿渚。酒滿甌。萬頃波中得自由。古今詩話。

悼周后

又見桐花發舊枝。一樓烟雨暮淒淒。凭闌惆悵人誰會。不覺潛然淚眼低。

層城無復見嬌姿。佳節纏哀不自持。空有當年舊烟月。芙蓉池上哭蛾眉。
嘗與周后移植梅花于瑤光殿之西。及花時。而后已殂。因成詩見意。

殷勤移植地。曲檻小欄邊。其約重芳日。還憂不盛妍。阻風開步障。乘月溉寒泉。誰料花前後。蛾眉卻不全。
失卻烟花主。東君自不知。清香更何用。猶發去年枝。

書靈筵手巾

浮生苦憔悴。壯歲失嬋娟。汗手遺香漬。痕眉染黛烟。

書琵琶背

侁自肩如削。難勝數縷條。天香畱鳳尾。餘煖在檀槽。

馬令南唐書。後主昭惠后周氏。大司徒宗之女。甫十九歲。歸于王宮。通書史。善音律。尤工琵琶。元宗賞其藝。取所御琵琶。時謂之燒槽者。賜焉。後主即位。册爲國后。後主嘗演念家山破。后復作遊醉舞。恨來遲。新破皆行于時。季子仲宣。后尤鍾愛。忽暴疾卒。后病遂亟。以元宗所賜琵琶及警臂玉環。親遺後主。沐浴正妝。自内含玉。殂于瑤光殿之西。室享年二十九。後主哀苦骨立。杖而後起。每於花朝月夕。無不傷懷。觸物寓意。多爲詩云。

悼幼子瑞保

永念難消釋。孤懷痛自嗟。雨深秋寂寞。愁引病增加。咽絕風前思。昏朦眼上花。空王應念我。窮子正迷家。

馬令南唐書。宣城公仲宣。後主子也。小字瑞保。三歲讀孝經。若成誦。然聞奏樂。輒審音調。宮中燕侍。頗合禮度。出見士大夫。改容顧揖。如成人禮。乾德二年卒。年四歲。始封宣城公。追贈岐王。諡懷獻。時昭惠病劇。後主恐重傷其意。默坐飲泣。因爲詩以寫。

志吟詠數四左

右爲之泣下

宣城公挽辭

珠碎眼前珍。花凋世外春。未銷心裏恨。又失掌中身。玉筍猶殘藥。香奩已染塵。前哀將後感。無淚可霑巾。豔質同芳樹。浮危道略同。正悲春落實。又苦雨傷叢。穠麗今何在。飄零事已空。沈沈無問處。千載謝東風。

馬令南唐書昭惠先病聞仲宣死哀苦

增劇遂至于殂故後主并其母子悼之

歸宋渡江作

江南江北舊家鄉。三十年來夢一場。吳苑宮闈今冷落。廣陵臺殿已荒涼。雲籠遠岫愁千片。雨打歸舟淚萬行。兄弟四人三百口。不堪閑坐細思量。

病中感懷

憔悴年來甚。蕭條益自傷。風威侵病骨。雨氣咽愁腸。夜鼎唯煎藥。朝髭半染霜。前緣竟何似。誰與問空王。
以上馬令南唐書

唐音戊籤云。煜少聰慧。善屬文。性好聚書。室中圖籍充切。鍾王墨跡尤多。置澄心堂于內苑。延引文士居其間。酷尚浮屠法。時請沙門講論。著雜說百篇。時人以爲可繼典論。兼善書畫。又妙于音律云。

海錄碎事。日映仙雲薄。

秋高天碧深。李後主句。

灑香律髓冷笑秦皇經遠略靜
憐姬滿苦時巡李後主詩也

詠柳書黃羅扇賜慶奴

風情漸老見春羞。到處銷魂感舊游。多謝長條似相識。強垂烟態拂人頭。

邵博聞見後錄南唐李侯

撤襟書宮人慶奴扇云云

蓉塘詩話茶所雜錄云

此後主歸命後所作

病中書事

病身堅固道情深。宴坐清香思自任。月照靜居唯擣藥。門扃幽院只來禽。庸醫懶聽詞何取。小婢將行力未禁。賴向空門知氣味。不然煩惱萬塗侵。

方虛谷云李後主號能詩詞集中多有

病詩憔悴衰颯似貧士大夫宜其亡也

秋鶯

殘鶯何事不知秋。橫過幽林尙獨游。老舌百般傾耳聽。深黃一點入烟流。棲遲背世同悲魯。瀏亮如笙碎在絳。莫更畱連好歸去。露華淒冷蓼花愁。以上唐音戊籤

題金樓子後并序

梁孝元謂王仲宣昔在荊州著書數十篇。荊州壞。盡焚其書。今在者一篇。知名之士咸重之。見虎一毛。不知其斑。後西魏破。江陵帝亦盡焚其書。曰文武之道。今夜盛矣。何荊州壞焚書二語。先後一轍也。詩以慨之。

牙籤萬軸裹紅綃。王粲書同付火燒。不是祖龍畱面目。遺篇那得到今朝。

楓窗小牘云。此詩同書藏內庫。今朝字誤。作金朝。徽庶惡而抹之。後竟如識入金。

句

鴛狂應有恨。蜨舞已無多。

老學菴筆記。後主作此。未幾亡國。

人生不滿百。剛作千年畫。野客叢書鬢從近日添。新白菊是去年依舊黃。任淵陳后山詩注。

李從善

從善字子師。元宗第七子。封韓王。入宋。改封楚國公。

陸游南唐書。韓王從善。因留京師。後主手疏求歸國。太祖不許。後主素友愛。每憑高北望。泣下霑襟。由是歲時游燕多罷不講。常製卻登高丈。

揮壘後錄。王景華故第。在京師太子巷。初開寶間。江南李後主遣其弟從善入貢。留不遣。建宅以賜。故都人猶以太子目之也。

薔薇一首十八韻呈東海侍郎徐鉉

綠影覆幽池。芳菲四月時。管弦朝夕興。組繡百千枝。盛引聽看徧。高煩架屢移。露輕濡綵筆。蠶誤拂吟髭。日照玲瓏幔。風搖翡翠帷。早紅飄薜地。狂蔓挂蛛絲。嫩刺牽衣細。新條宰草垂。晚香難暫捨。嬌態自相窺。深淺分前後。榮華互盛衰。尊前畱客久。月下欲歸遲。何處繁臨砌。誰家密映籬。絳羅房燦爛。碧玉葉參差。分得殷勤種。開來遠近知。晶熒歌袖袂。柔弱舞腰支。膏麝誰將比。庭萱自合嗤。勻妝低水鑑。泣淚滴烟澌。畫擬憑梁廣。名還亞楚姬。寄君十八韻。思拙媿新奇。全唐詩。

李從謙

從謙。元宗第九子。後主母弟也。風采峭整。喜爲律詩。動有規誨。封吉王。宋改封鄂國公。

觀碁

竹林二君子。盡日竟沈吟。相對終無語。爭先各有心。恃強斯有失。守分固無侵。若算機籌處。滄滄海未深。

馬令南唐書。後主燕閑。輿侍臣奕。從謙時數歲。侍側命賦觀棋詩云云。歎賞久之。

孟昶

昶字保元。後蜀高祖第三子。嗣僞位三十二年。宋師破成都。納降。歸于汴京。封開府儀同三司檢

校太師兼中書令秦國公乾德三年薨册贈尙書令追封楚王諡恭孝

避暑摩訶池上作

冰肌玉骨清無汗。水殿風來暗香滿。簾開明月獨窺人。欹枕釵橫雲鬢亂。起來瓊戶寂無聲。時見疎星渡河漢。屈指西風幾時來。不道流年暗中換。

漫叟詩話錢唐有一老

尼能誦後主詩云云

東坡洞仙歌序云僕七歲見眉州老尼姓宋忘其名自言嘗隨其師入蜀主孟昶宮中一日大熱蜀主與花蘂夫人夜起避暑摩訶池上作此詞具能記之

句

新年納餘慶嘉節號長春

蜀檮杌蜀未亡前一年歲除日昶令學士幸竇遜題桃符版于寢門以其詞非工昶命筆自題云云蜀平朝廷以呂餘慶知成都長春乃太祖誕聖節名也其符合如此

宋詩紀事卷八十七

錢唐 厲鶚 緝
平湖 陸騰 勘定

楊朴妻

送夫赴召

更休落魄耽杯酒，且莫猖狂愛詠詩。
今日捉將官裏去，者回斷送老頭皮。

東坡志林：真宗東封還，訪天下隱者，得杞人楊朴，能爲詩，召對，自言不能。上問臨行有人作送詩，卿否？朴曰：惟臣妻有一首云云。上大笑，放還山，命其子一官就養。

蔣桃

蔣桃寇萊公妾

呈寇公

一曲清歌一束綾，美人猶自意嫌輕。
不知織女螢窗下，幾度拋梭織得成。
風勁衣單手屢呵，幽窗軋軋度寒梭。
臘天日短不盈尺，何似妖姬一曲歌。

侍兒小名錄：拾遺萊公因會贈

歌姬以束綾蔣桃作詩呈公

劉元載妻

歷代吟譜孫冕三英集序云三英者三哲婦之詞也世有男子大誇篇詠而意隨語盡者滔滔皆然三英婦德天賦若此忍不序而稱之乎

詩話總龜天聖中禮部尚書孫冕序三英集劉元載妻詹光茂妻趙晟之母早梅寄遠惜別三詩劉妻哀子無立詹妻爾夫侍母病趙母懼子遠遊孫公愛其才以取之

早梅

南枝向暖北枝寒。一種春風有兩般。憑仗高樓莫吹笛。大家畱取倚闌干。歷代吟譜

詹光茂妻

寄遠

錦江江上探春回。銷盡寒冰落盡梅。爭得兒夫似春色。一年一度一歸來。歷代吟譜

趙晟母

惜別

暖有花枝冷有冰。佳人後會卻無憑。預愁離別苦相對。挑盡漁陽一夜燈。歷代吟譜

謝希孟

希孟字母儀。晉江人。景山之妹。嫁陳安國。早卒。

歐陽公序云希孟之詩尤隱約深厚守禮而不自放有古幽閑淑女之風非特婦人之能言也

詠芍藥

好是一時豔。本無千歲期。所以謔相贈。載之在聲詩。

句

爲花雖可期。論德亦終鮮。牡丹句牽主人衣。一步行不得。薔薇薰薰麝臍烈。灼灼猩血殷。躑躅樹旣摧爲薪。花亦落爲塵。凌霄豔陽一何好。零落千載冤。朱槿盜者得其便。掉頭笑且歌。曼陀羅花卞子眞賞。莊生夢還怯。蝴蝶花以上歷代吟譜

許氏

許氏、虞部之女。方勉妻。

夫犯夜禁。代呈郡守鄭毅夫。

明時樂事娛詩酒。帝里風光剩占春。況是白衣重得侶。不堪青旆自招人。早知玉漏催三鼓。肯把金貂換百巡。大抵仁人憐氣類。免教孤客作囚身。詩話總龜

句

匣劍未磨。晁錯血已聞。刺客殺袁絲。讀晁錯傳彤管遺編。

徐氏

徐氏、侍從宥之女。吳丞相妻。

偶題

絮吹柳陌三春雨。花落梨園一笛風。百尺玉樓簾半捲。夜深人在水晶宮。墨莊漫錄。

錢氏

錢氏封南宮縣君。

絕句

士悲秋色女懷春。此語由來未是真。儻若有情相眷戀。四時天氣總愁人。侯鯖錄。

王氏

王氏名文淑。荆公之妹。張奎妻。封長安縣君。鶚按墨莊漫錄。作荆公女。適吳丞相之子。封長安縣君。誤。今從隱居

詩話改正。

隱居詩話。張奎妻長安縣君。荆公之妹也。佳句爲最。其云草草杯盤供笑語。昏昏燈火話平生。荆公妻吳國夫人亦能文。嘗有小詞。約諸親游西湖。有云。待得明年。重把酒攜手。那知無雨。又無風。脫灑可喜。

戲詠白羅繫髻

香羅如雪縷新裁。惹住烏雲不放回。還似遠山秋水際。夜來吹散一枝梅。墨莊漫錄。

李氏

李氏建昌人。公擇之姊。江西洪竄郎中妻。封文城縣君。

挽兄公擇尚書

久歷金門貴，未酬黃屋知。如聞天祿客，抱恨作銘詩。皇朝類苑

王氏

王氏荆公女，吳安持妻，封蓬萊縣君。

李壁王荆文公詩注，介父二女，長

適吳安持，寶文閣待制，次適蔡卞。

寄父

西風不入小窗紗，秋意應憐我憶家。極目江山千萬恨，依然和淚看黃花。冷齋夜話

李樗大夫妻

文獻通考，李樗有毛詩詳解三十六卷。

陳氏曰：樗，閩之名儒，子林少穎爲外兄。

謝魏國范夫人

朝來瑞靄徧祥虛，果見麻姑降陋居。陶令滿籬唯有菊，相如四壁但藏書。蕭條庭館門羅雀，冷落杯盤食欠魚。缺後二句，過庭錄。

王氏

王氏平甫女，劉天保妻。

句

不緣燕子穿簾幕。春去秋來那得知。隱居詩話。

李珣

珣字溫叔。都官員外郎某之幼女。八歲能詩。適王常。汎舟江湖。溺死。

榴花

烈火真紅輕皺面。晨霞碎翦貼枝條。金刀刺出猩猩血。濺落芳叢久不銷。翰府名談。

魏夫人

魏夫人。襄陽人。道輔之姊。曾子宣丞相之妻。

句

使君自爲君恩厚。不是區區愛華山。

老學菴筆記。曾子宣丞相。元豐間帥慶州。

召還。往來潼關。夫人魏氏作詩戲之云。

女郎曹希蘊

贈乾明寺繡尼集句

睡起楊花滿繡牀。爲他人作嫁衣裳。因過竹院逢僧話。始覺空門氣味長。楊公彥齡筆錄。

新月

禁鼓初聞第一敲。乍看新月出林梢。誰家寶鏡新磨出。匣小參差蓋不交。

桐江詩話。女郎曹希蘊。貨詩都下。有人以敲枰交爲韻。索賦新月詩。曹賦云云。摹多遜之句也。

句

記得小軒岑寂夜。月移疎影上東牆。

漫叟詩話。希蘊詩雖格韻不高。時有巧語。嘗作墨竹詩云。此語最工。

賀方回姝

寄賀方回

獨倚危闌淚滿襟。小園春色嬾追尋。深恩縱似丁香結。難展芭蕉一寸心。

能改齋漫錄。方回眷一姝。別久。姝寄詩云云。賀因所寄詩。成柳色黃詞云。濛雨催寒。斜照弄晴。春意空闌。長亭柳色。幾黃。遠客一枝先折。烟橫水際。映帶幾點歸鴉。東風消盡龍沙雪。還記出門時。恰而今時節。將發畫樓芳酒。紅淚清歌。頓成輕別。已是經年。杳杳音塵都絕。欲知方寸。共有幾許清愁。芭蕉不展丁香結。枉望斷天涯。兩厭厭風月。

丁渥妻

寄外

淚溼香羅帕。臨風不肯乾。欲憑西去雁。寄與薄情看。

雲齋廣錄進士丁渥在太學夢歸家見妻子燈下披箋握管爲書寄生生曰我已至矣何用書爲妻但揮涕而不答又于別幅見詩云云生既覺以語同舍客客曰君思念之極以至于此後旬日得書并詩皆夢中所見無少差矣

并門徐帥屬內子

句

幕中舞客呈鸚鵡帳下牙兵困蒺藜和韻幕中有醉起舞者華袞自宜還舊物繡衣先見冠同寮和韻送屬官除監司故相家也

書齋續聞并門徐帥屬內子能詩林子中爲帥每首唱徐密寫歸衆方操觚內子詩已來必有可觀

陳氏

陳氏述古女適李氏

題小雁屏

紅蓼淡蘆敲曲水。幾雙容與對西風。扁舟阻向江鄉去。卻喜相逢一枕中。曲屏誰畫小瀟湘。雁落秋風蓼半黃。雲淡雨疎孤嶼遠。泠泠清夢到高唐。

書齋續聞陳述古女適李氏從夫仕晉寧軍判官部

使者以小雁屏求詩自作黃魯直小楷題其上云

謝氏

謝氏、王元甫妻。

送外

此去唯宜早早還，休教重起望夫山。君看湘水祠前竹，不是男兒淚染斑。青瑣高議

高氏

高氏、淮南士大夫妻。

暮春感懷

楊花日日長無定，海燕年年卻有歸。一瞬青春疾如電，等閑著盡縷金衣。歷代吟譜

盧氏

句

田舍轆轤出短牆，村落鞦韆挂高樹。寒食 歷代吟譜

葉桂女

桂女、字月流。

琵琶亭

樂天當日最多情，淚滴青衫酒重傾。明月滿船無處問，不聞商女琵琶聲。中山詩話

李氏女

李氏女、毘陵人。

詠破錢十六歲作

半輪殘月掩塵埃，依稀猶有開元字。想得清光未破時，買盡人間不平事。墨客揮犀。

鮑娘

題兌溪驛

谿驛舊名三，烟光滿翠嵐。須知今夜好，宿處是江南。

清波雜誌：衢信間驛名兌溪，謂其水作三道來，作彡字形。鮑娘有詩，蔣穎叔和之。

暨氏女

暨氏女，建安人。

句

多情樵牧頻寥首，無主蜂鶯任宿房。

春渚紀聞：建安暨氏女子，十歲能詩。賦野花云：觀者雖加驚賞，而知其後不保貞素，竟更數夫，流落而終。

王氏

王氏，趙德麟妻。

絕句

白藕作花風已秋。不堪殘睡更回頭。晚雲帶雨歸飛急。去作西窗一夜愁。

菖溪漁隱叢話。此趙德麟細君作也。德麟既歸居。因見此篇。遂與之爲親。余以爲此二十八字。媒也。

張氏

張氏芸叟女。司馬朴妻。

句

莫訝淚頻滴。都緣心未灰。滿目烟含芳草綠。倚闌露泣海棠紅。

墨莊漫錄。芸叟久經遷謫。快快不平。嘗內集分題賦詩。其女得蠟燭。有句云。淨休有慚色。司馬朴之室。芸叟女也。鄜延路上寺中一聯云云。或者便是詠燭者。

王氏

王氏曹組之母。兄弟幼孤。王氏教養成就。

雪中觀妓

梁王宴罷下瑤臺。窄窄紅鞵步雪來。恰是陽春三月暮。楊花飛處牡丹開。桐江詩話。

陳氏

陳氏蜀人。唐賢妻。

送張邦基母

宋詩紀事 卷八十七

念別每驚魂。流年多病身。惟我延陵子。情真意更親。分攜無淚盡。望遠起愁新。老眼將何暖。音書不厭頻。雪意亂江雲。江梅漸放春。雁歸人去後。愁與歲華新。榮路君方振。園居我豈貧。惟餘憂我念。相憶莫霑巾。

墨莊漫錄。唐暨潛亭。實蕭公猶子。余母之舅也。隱居襄陽。著周公政典。以周官定臧否。鄒志完爲序。娶陳氏。蜀人。令德純茂。尤工文章。大觀中。先君爲郡學官。代選。以詩送別。余母云云。

丘氏

丘氏朝奉郎丘舜中女。諸女皆能文詞。每兄弟內集。必聯詠爲樂。

寄外

簾裏孤燈覺曉遲。獨眠畱得宿妝眉。珊瑚枕上驚殘夢。認得蕭郎馬過時。西清詩話。

周仲美

題郵亭壁

世居京師。父游宦。家于成都。旣而適李氏子。侍舅姑。宦泗上。從良人赴金陵幕。偶因事棄官。入華山。有長往之意。仲美卽寄身合肥外祖家。方求歸。未得。會舅遽調任長沙。不免共載而南。雲水茫茫。去國益遠。形影相弔。灑涕何言。因書所懷于壁。

愛妾不愛子。爲問此何理。棄官更棄妻。人情寧可已。永訣泗之濱。遺言空在耳。三載無朝昏。孤幃淚如洗。婦人義從夫。一節誓生死。江鄉感殘春。腸斷晚烟起。西望太華峯。不知幾千里。王直方詩話。

郭暉妻

卷外

碧紗窗下啓械封。尺紙從頭徹尾空。應是仙郎懷別恨。憶人全在不言中。

葉夢得墜下放言。士人郭暉。因寄妻問。

誤封一白紙去。細君得之。乃寄一絕云。

秦少游女

句

眼前雖有還鄉路。馬上曾無放我情。靖康閒題壁。梅磻詩話。

李清照

清照號易安居士。濟南人。格非之女。趙挺之之子。明誠妻。其母王狀元拱辰女。亦工文章。清照晚節不終。再適張汝舟。流落江湖閒卒。有漱玉集。

朱子游藝論。本朝婦人能文。只有李易安與魏夫人。李有詩大略云。兩漢本繼紹。新室如贅疣。所以稔中散。至死薄殷周。中散非湯武。得國引之以比王莽。如此等語。豈女子所能。

若溪漁隱叢話。易安再適張汝舟。未幾反目。有啓事與綦處厚云。猥以桑榆之晚景。配茲駟儉之下材。傳者無不笑之。

雲麓漫抄。易安投翰林學士綦崇禮啓。清照啓。素習義方。龐明詩禮。近因疾病。欲至膏肓。牛蟻不分。灰釘已具。醫藥雖存。弱弟。應門惟有老兵。既爾蒼皇。因成造次。信彼如簧之說。惑茲似錦之言。弟既可欺。持官文書來輒信。身幾欲死。非玉鏡架亦安知。

儂僂難言。優柔莫決。呻吟未定。強以同歸。視聽才分。實難共處。猥以桑榆之晚景。配茲駟僮之下才。身既懷臭之可嫌。惟求脫去。彼素抱璧之將往。決欲殺之。遂肆侵凌。日加毆擊。可念劉伶之肋。雖勝石勒之拳。局地扣天。敢效談娘之善訴。升堂入室。素非李赤之甘心。外援難求。自陳何害。豈期末事。邇得上聞。取自哀衷。付之廷尉。被桎梏而置對。同凶醜以陳詞。豈惟賈生羞絳灌。爲儕何啻老子與韓非同傳。但祈脫死。莫望償金。友凶橫者十旬。蓋非天降。居囹圄者九日。豈是人爲。抵雀捐金。利當安往。將頭碎璧。失固可知。實自繆愚。分知獄市。此蓋伏遇內翰承旨。播紳望族。冠蓋清流。日下無雙。人閒第一。奉天克復。本緣陸贄之詞。淮蔡底平。實以會昌之詔。哀憐無告。雖未解驂。感戴鴻恩。如真出已。故茲白首。得免丹青。清照敢不省過。知慚。們心。識媿。責全責智。已難逃萬世之譏。敗德敗名。何以見中朝之士。雖南山之竹。豈能窮多口之談。惟智者之言。可以止無根之謗。高鷗尺鷃。本異升沈。火鼠冰蠶。雖同嗜好。達者共惜。童子皆知。願賜品題。與加灑洗。誓當布衣蔬食。溫故知新。再見江山。依舊一瓶。一鉢。重歸。獻畝。更須三沐。

三薰。恣在葭葦。敢茲塵瀆。

清波雜志。頃見易安族人言。明誠在建康日。易安每值天大雪。卽頂笠披蓑。循城遠覽。以尋詩。得句必邀其夫。寶和明誠每苦之也。

四六談塵。唐人祭文多用四六。雖韓退之亦然。故李易安祭趙湖州文曰。白日正中。歎龐公之機捷。聖城自墮。憐杞婦之悲深。婦人四六之工者。

瓊懷記。李易安。質人學生。啓中有云。無午未二時之分。有伯仲兩楷之侶。既繫臂而繫足。實難弟而難兄。玉刻雙璋。錦挑對練。注曰。任文二子學生。德卿生于午。道卿生于未。張伯楷。仲楷兄弟。形狀無二。白汲兄弟。母不能辨。以五綵繩一繫于臂。一繫于足。

上樞密韓公工部尚書胡公并序

紹興癸丑五月。兩公使金。通兩宮也。易安父祖出韓公門下。見此大號令。不能忘言。作詩各一章。以寄意。以待采詩者云。

三年夏六月。天子視朝久。凝旒望南雲。垂衣思北狩。如聞帝若曰。岳牧與羣后。賢寧無半千。運已過陽九。勿勒燕然銘。勿種金城柳。豈無純孝臣。識此霜露悲。何必羹捨肉。便可車載脂。土地非所惜。玉帛如鹿泥。誰當可將命。幣厚辭益卑。四岳僉曰俞。臣下帝所知。中朝第一人。春官有昌黎。身爲百夫特。行足萬人師。嘉祐與建中。爲政有臯夔。漢家畏王商。唐室尊子儀。是時已破膽。將命公所宜。公拜手稽首。受命白玉墀。曰臣敢辭難。此亦何等時。家人安足謀。妻子不必辭。願奉天地靈。願奉宗廟威。徑持紫泥詔。直入黃龍城。北人定稽顙。侍子當來迎。仁君方博信。狂生休請纓。或取犬馬血。與結天日盟。

胡公清德人。所難謀。同德協心志。安脫衣已被漢恩。煥離歌不道易水寒。皇天久陰后土溼。雨勢未回風勢急。車聲麟麟馬蕭蕭。壯士懦夫俱感泣。閭閻嫠婦亦何知。瀝血投書干記室。葵丘踐土非荒城。勿輕談士棄儒生。露布詞成馬猶倚。峭函關出雞未鳴。巧匠何曾棄樗櫟。芻蕘之言或有益。不乞隋珠與和璧。只乞鄉關新信息。靈光雖在應蕭條。草中翁仲今何若。遺氓豈尙種桑麻。敗將如聞保城郭。嫠家父祖生齊魯。位下名高人比數。當時稷下縱談時。猶記人揮汗成雨。子孫南渡今幾年。漂零遂與流人伍。欲將血淚寄山河。去灑東山一坏土。靈麓漫抄

浯溪中興頌詩和張文潛

五十年功如電掃。華清花柳咸陽草。五坊供奉鬪雞兒。酒肉堆中不知老。胡兵忽自天上來。逆胡亦是姦雄才。勤政樓前走胡馬。珠翠踏盡香塵埃。何爲出戰輒披靡。傳置荔枝多馬死。堯功舜德本如天。安用區區紀文字。著碑銘德真陋哉。迺令神鬼磨崖。子儀光弼不用猜。天心悔禍人心開。夏爲殷鑒當深戒。簡策汗青今具在。君不見當時張說最多機。雖生已被姚崇賣。

君不見驚人廢興傳。天寶中興碑上今生草。不知負國有姦雄。但說成功尊國老。誰令妃子天上來。虢秦韓國皆天才。苑桑羯鼓玉方響。春風不敢生塵埃。姓名誰復知安史。健兒猛將安眠死。去天尺五抱甕峯。峯頭鑿出開元字。時移勢去真可哀。姦人心醜深如崖。西蜀萬里尙能反。南內一閉何時開。可憐孝德如天大。反使將軍稱好在。嗚呼奴輩乃不能道輔國用事張后尊。乃能念春薺長安作斤賣。清波雜志

曉夢

曉夢隨疎鐘。飄然躡雲霞。因緣安期生。邂逅萼綠華。秋風正無賴。吹盡玉井花。共看藕如船。同食棗如瓜。翩翩坐上客。意妙語亦佳。嘲辭鬪詭辨。活火分新茶。雖非助帝功。其樂何莫涯。人生能如此。何必故歸家。起來斂衣坐。掩耳厭喧譁。心知不可見。念念猶咨嗟。

感懷

寒窗敗几無書史。公路可憐合至此。青州從事孔方君。終日紛紛喜生事。作詩謝絕聊閉門。燕寢凝香有佳思。靜中我乃見至交。烏有先生子虛子。

春殘

春殘何事苦思鄉，病裏梳頭眼最長。梁燕語多終日在，薔薇風細一簾香。以上彭管遺編。

夜發嚴灘

巨艦只緣因利往，扁舟亦是爲名來。往來有媿先生德，特地通宵過釣臺。釣臺集

句

詩情如夜鶻，三繞未能安。少陵也自可憐人，更待明年試春草。以上風月堂詩話。南來尙怯吳江冷，北狩

應悲易水寒。南渡衣冠少王導，北來消息欠劉琨。建炎初作。以上詩話雋永。

楊氏

楊氏越漁者楊翁女，歸謝生。

與謝生聯句

珠簾半牀月，青竹滿林風。楊何事今宵景，無人解與同。謝宮園詩史。

陸放翁妾

題壁

玉階蟋蟀鬧清夜，金井梧桐辭故枝。一枕淒涼眠不得，呼燈起作感秋詩。

隨隱漫錄。陸放翁宿驛中見題壁詩，詢之驛卒女也。遂納爲妾。方餘半載，夫人逐之。妾賦卜筮子云：只知眉上愁，不識愁來路。窗外有芭蕉，陣陣黃昏雨。曉起理殘妝，整頓教愁去。不合畫春山，依舊團愁住。

文婉

文婉、温州樂清人、錢氏婦。

句

霜月天邊清興遠、金鐘雲裏夢魂閑。題白石山。詩女史。

呂氏

呂氏、伯恭之祖姑、封清源君。

句

前身當是陶淵明、愛酒不入遠公社。詩女史。

韓玉父

題漢口鋪并序。

妾本秦人、先大父嘗仕于朝、因亂、遂家錢唐、幼時、易安居士教以詩、及笄、父母以妻上舍林子建、去年、林得官、歸闈、妾傾囊以助其行、林許秋冬閒遣騎迎妾、久之杳然、何其食言耶、不免攜女奴自錢唐而之三山、比至、林已官、吁、江矣、因而復回延平、經由順昌、假道昭武而去、歎客旅之可厭、笑人事之多乖、因理髮漢口鋪、漫題數語于壁云。

南行踰萬山、復入武陽路、黎明與雞興、理髮漢口鋪、吁、江在何所、極目烟水暮、生平良自珍、羞爲浪子婦、知君非秋胡、強顏且西去。彤管遺編。

何師鑑

師韞字季才，金谿人。抱甕先生天果女，嫁臨川饒氏。四十而寡，所居有懶愚樹，遂榜室曰懶愚。有詩集。

自題懶愚室

君不見南嶽懶殘師，伴狂啖殘食，粥涕任垂頤。懶爲俗人拭，又不見愚溪子。柳子堂堂古遺直，因以愚名溪。于今慕其德，二子真吾師。欲見不可得，唯有懶愚樹。終日對顏色，齊威勤讀書。輪扁巧斲輪，勤巧動心志。何如懶愚真，衰年髮已皤。行少坐時多，亦欲倣勤巧。奈此懶愚何。夷堅志

失假山偈

片石亡來歲月深，昔時尋覓到而今。元來只在家山裏，枉費工夫別處尋。

撫州府志：何氏喜浮屠教，徧閱華嚴諸經。一日，偈夫往白楊山，作失假山偈云：年四十，孀居，紹興間，張魏公浚迎侍母鎮國太夫人。帥閩道出界山，太夫人亦通禪學，聞其名，踵門一見，契合，呼爲無生法友。

汪氏

汪氏，彥章女，內江劉五清之配。

寄良人

旅食京華歲月多，聖賢事業竟如何。明年佇聽泥金報，閑把關雎獨自歌。四川總志

朱淑真

淑真，號幽棲居士，錢唐人。世居桃村。工詩，嫁爲市井民妻，不得志，歿。宛陵魏仲恭輯其詩，名曰斷

腸集

傷春

覽鏡驚容卻自嫌。逢春長是病厭厭。吹花弄粉新來嬾。惹恨供愁近日添。生怕子規聲到耳。苦羞雙燕語穿簾。眉頭眼底無他事。須信離情一味嚴。

初夏

竹搖清影罩幽窗。兩兩時禽噪夕陽。謝卻海棠飛盡絮。困人天氣日初長。

秋夜

夜久無眠秋氣清。燭花頻翦欲三更。鋪牀涼滿梧桐月。月在梧桐缺處明。

馬塍

一塍芳草碧芊芊。活水穿花暗護田。蠶事正忙農事急。不知春色爲誰妍。以上斷腸集

賦小鬢舞五絕

管弦催上錦茵時。體態輕盈祗欲飛。若使明皇當日見。阿蠻無計誑楊妃。
香茵穩襯半鉤月。往來凌波雲影滅。弦催拍緊促將徧。兩袖翩然作回雪。
柳腰不被春拘管。鳳轉鸞回霞袖緩。舞徹伊州力不禁。筵前撲簌花飛滿。
占斷京華第一春。清歌妙舞實超羣。只愁到曉人星散。化作巫山一段雲。
獨花影裏粉姿閑。一點愁侵兩點山。不怕帶他飛燕妒。無言逐拍省弓彎。

西湖志餘與淑真同時有魏夫人亦能詩嘗置酒邀淑真命小鬟隊舞因索詩以飛雪滿翠山爲韻淑真醉中援筆賦五絕云云不惟詞旨豔麗而舞態之妙亦可想見也

劉彤

彤字文美江寧章文虎妻

寄外

碧紗窗外一聲蟬牽斷愁腸嬾晝眠千里才郎歸未得無言空撥玉爐烟茗溪漁隱詩話

陳氏

陳氏號梅莊提刑仲微女適新昌胡縣丞有詩集

述懷

一片愁心怯杜鵑嬾妝從任鬢雲偏怕郎說起陽關意常掩琵琶第四弦

山城落日弄昏黃又了平生半日忙侍妾不須燒絳蠟讓他明月入回廊名媛瓊囊

黃淑

淑字致柔適建寧進士王防寡居後族議改適因詠竹以見志

詠竹

勁直忠臣節孤高烈女心四時同一色霜雪不能侵名媛瓊囊

連倩女

倩女、延平人。適鄰生陳彥臣。

題竹簾

綠筠劈破條條直。紅線經回眼眼奇。爲愛如花成片段。致令直節有參差。名媛瓊囊。

華春娘

春娘、適徐君亮。

贈外

燕子樓中燕子飛。芹泥一點誤霑衣。主人頻起嗔嫌意。垂下珠簾不放歸。彤管新編。

黃氏

黃氏、適福建潘用中。

感懷

闌干閑倚日偏長。短笛無情苦斷腸。安得身輕如燕子。隨風容易到君傍。名媛瓊囊。

謝慧卿

慧卿、巴縣人。有閨餘集。

絕句

尋得桃源可學仙。丹書唯恐鳳飛傳。雨收峯頂雲歸洞。風到池塘月滿天。四川總志。

王瓊奴

瓊奴徐苕郎妻。

荅外

茜色霞箋照面頰。玉郎何事太多情。風流不是無佳句。兩字相思寫不成。名媛機囊。

林杜娘

杜娘、杭州新城人。

遊碧沼勝居

幽谷泉聲冷。鳥啼僧定深。好花叢古砌。寒瀑發高岑。遊客陸鴻漸。居人支道林。欲歸青嶂去。臨去復沈吟。
形管遺編。

朱逸仙

寄元驥卿

郎今多病如家令。妾自拚躬怨楚王。斜壓玉釵成獨夢。低垂元髮繫柔腸。四朝詩。

金麗卿

麗卿、杭州人。

題廣信道中

家住錢唐山水圖。梅邊柳外識林蘇。平生慣占清涼國。豈料人間有暑途。古杭雜記詩集。

賈蓬萊

春曉

方池水影薄。曲檻鳥聲嬌。鸞鏡紅綿冷。蛾眉翠黛消。冶容舒嫩萼。幽思結柔條。織指收花露。輕將雪粉調。

謝姊惠鞵

蓮瓣娟娟遠寄將。繡羅猶帶指尖香。弓彎著上無行處。獨立花陰看雁行。以上彤管遺編。

鄧氏

寄衣

欲寄寒衣上帝都。連宵裁翦眼模糊。可憐寬窄無人試。淚逐西風灑去途。四朝詩。

來氏

來氏豫章人。

水仙花二首

瑤池來宴老仙家。醉倒風流萼綠華。白玉斷筭金暈頂。幻成癡絕女兒花。

花盟平日不曾寒。六月曝根高處安。待得秋殘親手種。萬姬圍繞雪中看。全芳備祖。

女郎張惠卿

題常山店壁

迢遞投前店。颼颼守破窗。一燈明復暗。顧影不成雙。清波雜志。

毛友龍妻

寄外

剪燭親封錦字書。擬憑歸雁寄天隅。經年未報干秦策。不識如今吾在無。詩話總龜

沈清友

清友、姑蘇女子。

絕句

晚天移棹泊垂虹。閑倚篷窗問釣翁。爲底鱸魚低價賣。年來朝市怕秋風。

隨隱漫錄。清友一絕。得風人之體。又詠漁父。起家紅蓼岸。傳

世綠蓑衣。詠牧童。自使牛背穩。卻笑馬蹄忙。得下字之工。

于本大妻

本大、故姓許。旌陽族也。得仙術。又變姓名。夫婦偕隱西山下。

得仙詩

醉舞狂歌踏落花。綠羅幫帶有丹砂。往來城市買山藥。那箇西山是我家。宮闈詩史

楊氏婦

楊氏婦、永嘉人。

送夫從軍

海壇門外浪滔天。妾上城樓君上船。回首西風深巷底。梅花霜月夜如年。東甌詩集

俞氏

俞氏號菊窗。

賀陳隨隱以布衣除東宮掌書

萬人海裏闢幽扉。欲學深居只布衣。不道內前車馬鬧。又催父子入宮闈。隨隱漫錄。

宋氏

宋氏天台人。

鸞廬

自歎年來刺骨貧。吾廬今已屬西鄰。殷勤說與東園柳。他日相逢是路人。

趙葵行營雜錄。天台宋氏家本富。後貧。鸞廬于鄰。價成。作詩云云。富者見詩惻然。卽以券還之。亦不索其直。鄉人嘉其誼。

趙葵姬

絕句

柝聲默報早朝回。滿院春風繡戶開。怪得無人理絲竹。綠陰深處摘青梅。

古今女史。趙葵同知樞密院。朝罷歸私第。而諸姬不見。葵往訪之。乃羣聚摘青梅。有一姬善詩賦。葵責令賦詩云云。

韓希孟

希孟巴陵人。魏公五世孫。襄陽賈尚書子瓊之婦。年十八。開慶初。元兵至岳陽。爲卒所掠。赴水。越三日。得其屍。練裙帶中有詩。曰。潞按練裙帶中詩。宋史與輟耕錄不同。今兩存之。

練裙帶詩

我質本瑚璉。宗廟供蘋蘩。一朝嬰禍難。失身戎馬閒。寧當血刃死。不作衽席完。漢上有王猛。江南無謝安。長號赴洪流。激烈摧心肝。宋史列女傳。

又

宋未有天下。堅正臣禮秉。開國百戰功。每陣惟雄整。及侍周幼主。臣心常炯炯。帝曰卿北伐。山戎今有警。死狗莫擊尾。此行當繫頸。卽日辭陛下。盡敵心欲逞。陳橋忽兵變。不得守箕穎。禪讓法堯舜。民物普安靜。有國三百年。仁義道馳騁。未改祖宗法。天胡肆大眚。細思天地理。中有幸不幸。天果喪中原。大似裂冠衽。君誠不獨活。臣實無魏丙。失人焉得人。垂戒嘗耿耿。江左無謝安。塞北有王猛。所以戎馬來。飛渡巴陵境。大江限南北。今此一舴艋。本期固封疆。誰謂如畫餅。烈火燎昆岡。不辨金玉礦。妾本良家子。性僻守孤梗。嫁與尙書兒。銜署紫蘭省。直以才德合。不棄宿瘤瘦。初結合歡帶。誓比日月晒。鴛鴦會雙飛。比目願常並。豈期金石堅。化作桑榆景。旄頭熱正然。蚩尤氣先屏。不意風馬牛。復及此燕郢。一方遭劫虜。六族死俄頃。退鷁落迅風。孤鸞弔空影。簪堅折白玉。瓶沈斷青綆。一死空冥府。憂心長炳炳。意堅志不移。改邑不改井。我本瑚璉器。安肯作溺皿。志節匪轉石。氣噎如吞鯁。不敢爇火然。願爲死灰冷。貪生念麴蟻。乞憐羞虎穿。借此清江水。葬我全首領。皇天如有知。定作血面請。願魂化精衛。填海使成嶺。輟耕錄。

節婦王氏

王氏臨海人。

題清風嶺崖石

君王無道妾當災，棄女拋男逐馬來。夫面不知何日見，此身料得幾時回。兩行清淚偷頻滴，一片愁眉鎖未開。迴首故山看漸遠，存亡兩字實哀哉。

東園客談：至元十三年，丞相伯顏平宋，以偏師徇台，台之臨海民婦王氏者，美姿容，被掠于夫長，殺其舅姑，與夫而欲私之，婦誓死不可，自念且被污，因陽曰：能俾我爲舅姑與夫服，期月乃可。事主君，千夫長見其不難于死，從所請，仍使伴婦雜守之。師還，挈行至嶺，過清風嶺，婦仰天竊歎曰：吾知所以死矣。卽齧拇指出血，寫口占詩于崖石上，寫畢投崖下，以死死之日，距今且將八九十年。石上血墳起如始寫時，不爲風雨所剝蝕，縣丞謝端爲之立祠。

盧氏

盧氏，荆門州人，統制吳源妻。

送夫赴襄陽

羨君家世舊纓簪，百戰常懷報主心。草檄有才追記室，築臺無路繼淮陰。射鵰紫塞秋雲黑，走馬黃河夜雪深。白首丹衷知未變，歸來雙肘印黃金。

絕命詞

夫爲長弘，而妾感其妾詩，夫妻同死，義天地一淒其。

荆門紀略。源救襄陽。陣歿。氏聞赴。大慟。部署家事。畢。焚香泣。拜曰。夫死。王事忠也。妾敢不相從。于地下。遂賦此詩。自縊死。

杜氏婦

北行作

江淮幼女別鄉閭。好似明妃遠嫁無。默默一心歸故國。區區千里逐狂夫。慵拈簫管吹羌曲。嬾繫羅帶舞鷓鴣。多少眼前悲泣事。不如花柳舊江都。山房隨筆。

英州司寇女 以下無姓名閨媛。

過梅嶺題 并序

妾幼年侍父任英州司寇。既代歸。父以大庾本號梅嶺。今蕩然無一株。遂市三十本植于嶺之左右。因畱詩于寺壁。今隨夫任端溪。復至此嶺。已爲圻饒者所覆。卽命墨于故處。

滇江今日掌刑回。上得梅山不見梅。輟俸買栽三十樹。清香畱與雪中開。墨客揮犀。

上庠士人妻

寄鞵韞

細鞵宮鞵巧樣新。殷勤寄與讀書人。好將穩步青雲上。莫向平康漫惹塵。名媛瓊囊。

太學生妻

寄夫

數日相望極。須知意思迷。夢魂不怕險。飛過大江西。

合璧事類前集。有書生娶後遊太學。久不歸。一夕夢返其家。見妻秉燭寫詩。書生怪而記之。後家書至。有詩一首。如夢中所見無殊。夢之夕。乃發書之日。

浣花女

潭畔芙蓉

芙蓉花發滿江紅。盡道芙蓉勝妾容。昨日妾從隄上過。如何人不看芙蓉。顧氏積書廢選。

無名女子

永安驛題柱

無人解妾心。日夜長如醉。妾不是瓊奴。意與瓊奴會。名媛磯蠶。

崖州女子

詠花扇

團扇畫方新。金花照席茵。那緣燈下見。更值月中人。四朝詩。

無名女子

靖康閒題鄧州南陽驛壁

流落南來自可嗟。避人不敢御鉛華。卻思當日鶯鶯事。獨立東風霧鬢斜。陶朱新錄。

無名婦人

句

蚌胎光透殼，犀角暈盈尖。詠月。許彥周詩話。

鄱陽婦人

建炎初題黃連步接官亭壁

妾鄱陽人也。女工之外，從事詩禮。不幸嚴霜下墜，泰山其頽，飄泊一身，所適非偶。薰蕕同器，情何以堪。昨浮家洞庭，怒張一帆。良人條爲鬼錄，吁！臣不事二主，女不事二夫。其奈何哉！偶攜稚子來登客亭，感時傷心，遂成小絕。知我者其天乎。

故里蕭條一望閒，此身飄泊歎空還。感時有恨無人說，愁斂雙蛾對暮山。景定建康志。

宋詩紀事卷八十八

錢唐厲鶚緝

吳和施廷樞勘定

張繼常

繼常宋初入內都知爲鎮戎軍鈴轄

題鎮戎軍廳壁

夜聞磧外鈴聲苦曉聽城頭畫角哀不是感恩心似鐵誰人肯向此閒來楊文公談苑

裴愈

愈字益之真宗朝內臣奉命江南搜訪遺書名畫歸奏稱旨用是累居三館以聞識自任

句

東吳山色家家月南楚江聲浦浦風送魯秀才南遊楊柳影疎秋霽雨梧桐葉墜夕陽天聞蟬皇朝類苑

裴湘

湘字楚老愈之子仁宗朝內臣有肯堂集

賦得和氣致祥應詔

君德承天道沖融協太和卿雲呈瑞早膏澤應時多煦集連枝本嘉扶異穎禾五星還聚井丹鳳更巢阿

戴澤無遺士邊防久息戈。黔黎逢至化，稽首載賡歌。

青箱雜記：明道中，仁宗御便殿，試進士詩賦，亦命湘賦之。數刻而成，仁宗嗟賞。左右中人爲之動色。翰林李公淑序其集云：予嘗嘉河東父子起銀疉，右貂能以屬辭，拔其倫益之三朝侍臣。老不廢學，又課厲二子，使皆有立約已愼履，如周仁石慶而楚

老孳孳嗜書。

克自泮塚云。

岑宗旦

宗旦字子文，開封人。仁宗朝，以父遺表通籍壁門，終九品官。善行書，有漢唐十一人書評。

宣和書譜：宗旦趣尚高遠，不爲苟合，取容于世。年十七，棄官遊東南山水間。暮年一無嗜好，寄傲親朋，略不爲身後計。得酒輒醉，酣長哦，揮灑以爲真樂。

聽琴詩

琴中太古意，方外無爲心。彈之道頗散，不彈理彌深。所以陶元亮，何須弦上音。宣和書譜。

王紳

紳，元豐初內官，效王建作宮詞百首以獻。

太皇太后生日詩

太皇生日最尊榮，獻壽宮中未五更。天子捧觴仍再拜，寶慈侍立到天明。寶慈，皇太后宮名。

太后幸景靈宮駕前露面雙童女詩

平明彩仗幸琳宮，紫府仙童下九重。整頓瓏璫時駐馬，畫工闔地覩眞容。以上溫公續詩話。

宋詩紀事卷八十九

錢唐 厲鶚 緝
錢唐 陳皐 勘定

張元

元、華州人入西夏。

容齋三筆。西夏曩霄之叛。其謀皆出于華州士人張元與吳昊。而其事本末。國史不書。比得田畫承君集。實紀其事云。張元。吳昊。姚嗣宗。皆關中人。負氣倜儻。有縱橫才。相與友善。嘗薄遊塞上。觀峴山川風俗。有經略西鄙意。姚題詩峴山寺壁。范文正公巡邊見之。大驚。又有踏破賀蘭石。掃清西海塵之句。張爲鸚鵡詩。卒章有好著金籠收拾取。莫教飛去別人家。昊亦有詩。將謁韓范二帥。恥自屈。不肯往。乃礮大石刻詩其上。使壯夫拽之于通衢。三人從後哭之。欲以鼓勸二帥。既而果召與相見。躊躇未用。開張昊徑走西夏。范公以急騎追之不及。乃表姚入幕府。張昊及至夏國。夏人以爲謀主。以抗朝廷。連兵十餘年。四方至爲疲弊。職此二人爲之。時二人家屬羈縻隨州。閒使諜者矯中國詔釋之。人未有知者。後乃聞西人臨境作樂。迎此二家而去。自是邊帥始待士矣。張有雪詩。吳詩獨不傳。觀此數聯。可想見其人。非池中物也。承君所記如此。予謂張昊在夏國。然後舉事。不應韓范作帥日。尙猶在關中。豈非記其歲時先後不審乎。張昊之名。正與羌酋二字同。蓋非偶然也。

雪

五丁仗劍決雲霓。直取銀河下帝畿。戰死玉龍三十萬。敗鱗風卷滿天飛。

四清詩話華州狂子張元天聖閒坐累終身每託興吟詠如雪詩云云又白鷺云有心待擗月中兔更向白雲頭上飛怪謔類是

劉三殿

三殿河閒人遼駙馬都尉慶歷中奔宋遣歸殺之

自陳詩

雖慚滂勺赴滄溟仰訴丹衷不爲名寅分星辰將降禍兌方疆寓卽交兵春秋大義惟觀釁王者雄師但有征救得燕民歸舊主免于戎虜自稱兄

儒林公議契丹既有幽薊及雁門以北亦開舉選以收士人幽州劉氏昆弟其名曰二元三殿四端五常六符皆在被遇三殿四端復尙主慶歷年秋三殿攜嬖妾偕一子投廣信軍詞情悲切自言主兇狠必欲殺其妾與子故歸朝廷頗詢其國中機事復爲詩以自陳朝廷以誓約旣久恐納之生釁虜又移文邊郡詎知三殿未還求索峻切期于必得不然則舉兵嚙好矣朝廷乃遣還三殿復由西山路入定州境所至以金賂村民求宿食勢亦窘迫定帥遣人搜索拘送比三殿至幽州其妻已先在矣乃殺其妾與子械送三殿以其孀弟皆方委任遂貸三殿死使人監錮之

遼史劉慎行累遷至北府宰相子六人一德二元三殿四端五常六符殿端符皆第進士殿端俱尙主爲駙馬都尉三殿獻聖宗一矢斃雙鹿賦上嘉其瞻麗與公主不諧奔宋歸殺之

韓璘

璘金人紹興中歸宋不果遇害

題扇寄弟

嚙嚙鳴雁落江濱。夢裏年來相見頻。吟盡楚辭招不得。夕陽愁殺倚樓人。

四朝聞見錄。司馬文季使北不屈。在北生子名通國。字武子。蓋本蘇武之意。通國有大志。嘗結北方之豪韓玉。舉事未得要領。紹興初。玉挈家而南。授江淮都督府計議軍事。其兄璘在北。亦與通國善。癸未九月。以扇寄玉詩云。都督張魏公見此詩。甲申春。遣侯澤往大梁。諷璘通國等。至亳州。爲邏者所獲。通國璘與常所與交。轟山等三百餘口同日遇害。是歲三月十六日也。

宋詩紀事卷九十

錢唐 厲鶚 輯
歙 吳震生 勘定

鍾離權

宣和書譜。神仙鍾離先生。名權。不知何時人。閒出接物。自謂生于漢。呂洞賓于先生執弟子禮。自稱天下都散漢。字畫飄然有凌雲氣。

草書詩

露滴紅蘭玉滿畦。閑拖象履到峯西。但令心似蓮花潔。何必身將槁木齊。古塹細香紅樹老。半峯殘雪白猿啼。雖然不是桃花洞。春至桃花亦滿溪。

夷堅志。淳熙十一年。溧陽倉斗子。坐盜官米。黥配而籍其家。得草書二軸。題云庚申歲書其名權。花押止如一劍之狀。蓋鍾離翁也。其詞云云。李粹伯跋之曰。字畫放逸。有翊龍舞鳳之勢。脫去尋常畦徑。非得于心而應于手者。不能爾。飄然神仙風度。固有所本。云真本藏于建康府治軍質庫。絹素標飾處皆斷裂。獨字畫不動。景裴嘗見之。庚申歲者。豈非藝祖創業建隆元年乎。

示太原學士

風燈泡沫兩相悲。未肯遺榮自保持。頷下藏珠當猛取。身中有道更求誰。才高雅稱神仙骨。智照靈如大

寶龜一半青山無買處，與君攜手話希夷。元祐七年九月九日鍾離權書。

雲麓漫抄莊綽跋云昔維揚有何仙姑者世以爲謫仙能與真靈接一日鍾離過之使治黃素乃書此詩呂公亦跋其後令侯王學士至授之後數日王古敏仲自貳卿出守會稽至維揚訪姑即以與之王祕不以示人

呂 岳

岳字洞賓關右人唐德宗朝呂渭之孫咸通中舉進士不第值黃巢亂攜家隱居終南山學老子法年百餘歲而狀貌如嬰兒世傳有劍術時至陳搏室其事跡多顯于宋

書楚州紫極宮小軒

宮門闌一入獨凭闌干立終日不逢人朱頂鶴聲急避暑錄話

題岳州古寺二首

朝遊北海暮蒼梧袖有青蛇膽氣麤三醉岳陽人不識朗吟飛過洞庭湖
獨自行時獨自坐無限時人不識我惟有城南老樹精分明知道神仙過

蒙齋筆談洞賓呂渭之後五代間從鍾離權得道權漢人不老自本朝以來與權更出沒人間權不甚多而洞賓蹤跡數見好道者每以爲口實余記童子時見大父魏公自湖外罷官還道岳州客有言洞賓事者云近歲常過城南一古寺題二詩壁間而去說者云寺有一大古松呂始至時無能知者有老人自松顛徐下致恭故詩云然

書沈東老壁

西鄰已富髮不足，東老雖貧樂有餘。白酒釀來緣好客，黃金散盡爲收書。

避暑錄話：東林沈氏，世爲著姓。元豐間有名某字東老者，家頗藏書，喜賓客。東林富錢，唐往來之衝，故士大夫輿游，客踴士聞其好事，必過之。沈亦應接不倦，嘗有布裘青巾，稱回山人，風神超邁，與之飲，終日不醉。薄暮取食，餘石榴皮，書一絕壁間，卽長揖出門，越石橋而去，追躡之，已不見，意其爲呂洞賓也。

留詩太平寺

手內青蛇凌白日，洞中仙果豔長春。須知物外煙霞客，不是尋常磨鏡人。

青瑣高議：賈師雄，郎中，治平中，通判邵武，嘗收鐵鏡甚大，非常物也。久欲淬磨，未得其人。左右言近有回處士，自言善磨鏡，召至風骨軒昂，非常人也。飲酒畢，堆藥鏡上，言藥少，當自取之。既去不回，詢其宿在太平寺，留詩一絕而去。取鏡視之，藥已化去。堆藥處一點，表裏通明，如寒玉春水。

書與胡詠之

濟世應須不世才，調羹重見用鹽梅。種成白璧人何處，熟了黃粱夢未回。相府舊開延士閣，武夷新築望仙臺。青雞唱徹函關曉，好卷游韓歸去來。

題秦州天慶觀壁

石池清水是吾心，漫被桃花倒影沈。一到邽山空闕內，消閑塵累七弦琴。

墨莊漫錄鄱陽胡詠之朝散生平好道元符初嘗于信州弋陽縣見一道人青巾葛衣神氣特異因揖而延之對飲道人指取大白滿引無算曰君有從軍之行去否胡竦然曰當去蓋是時欲就熙河帥姚雄之辟也道人曰西陲方用師好去素紙書詩云云授詠曰爲我以此寄章相公且曰章相公好箇人又錯了路徑也問其姓名不肯言乃拂衣去明日因告縣令徧邑物色竟無見者詠至京師見王副車誥具告以此欲持詩謁子厚誥曰慎不可上方以邊事倚辦相公丞相得此必堅請去上必疑怪詰其所以然君且得罪詠以爲然徑趨幕從取青唐既還闕則子厚已去矣他日子厚北歸聞有此詩就詠求之其真本已爲副車奄有乃錄寄之子厚見詩嘆曰使吾早得此詩去位久矣豈復有今日乎方詠之在邊日嘗至秦州天慶觀聞說呂先生在此月餘近日方去矣問何以知其爲呂道士云道人去時適道衆皆赴鄜郡醮道人顧小童曰吾且去借筆書壁候師歸示之小童辭以觀新修戒勿令灑乃曰煩貯火殿爐吾欲禮三清而去旣而行殿後砌下有池水甚清泚乃以爪畫殿壁留詩云云後題回字衆驚歎以爲必呂翁也壁甚高其字非手可能及邽山卽秦山也此說予聞江元一太初云

題冢上亭

冢上爲亭鬼莫噴冢頭人卽冢中人
凭欄莫起存亡意除卻虛空總是塵

西溪叢語襄漢隱者躬耕數畝因古冢爲亭往來題詩甚富一日柱閒得一絕相傳呂翁作也

題崇元觀在吉水縣

寒裳懶步尋真宿清景一宵吟不足
月在碧潭風在松何必洞天三十六
方輿勝覽

題京師景德寺東廊三學院壁

明月斜。秋風冷。今夜故人來不來。教人立盡梧桐影。庚溪詩話

題靈石屋山

南塢數回泉石。西峯幾疊煙雲。登攜孰以爲侶。顏寓李甲蕭松。

竹坡詩話。西湖詣寺。所存無幾。唯南山靈石猶是舊屋。寺僧言。頃有數道人來丐食。拒而不與。乃題詩屋山而去。至今猶在。字畫頗類李北海好事者譚之。乃是呂洞賓與三人者來耳。李甲近世人。東坡以比郭恕先。善畫而有文餘。不知爲何人。當是神

也。仙

呂仙牧童

絕句

草鋪橫野六七里。笛弄晚風三四聲。歸來飽飯黃昏後。不脫蓑衣臥月明。

西清詩話。鍾弱翁帥平涼。一方士通謁。從牧童牽黃犢立于庭下。弱翁異之。指牧童曰。道人頗能賦此乎。笑曰。不煩吾語。是兒能之。牧童乃操筆大書云云。既去。鄙人見方士擔兩大甕。長歌出郭。迹之不見。兩甕乃兩口。豈洞賓耶。

許堅

許堅江左人。早歲以時事干江南李氏。不見。禮拂衣歸隱茅山。太平興國八年。自茅山游廬山。或在洪州西山。吉州玉笥山。

宿溧陽靈泉精舍僧以白字韻請留詩

近枕吳溪與越峯。前朝恩賜靈泉額。竹林晴見雁塔高。石室曾棲幾禪伯。荒碑字沒秋苔深。古池香汎荷花白。客有經年別故林。落日啼猿情脈脈。郡閣雅談。

張虛白

虛白、邢州人。

遺崔母

武陵溪畔崔婆酒。天上應無地下有。南來道士飲一斗。醉臥白雲深洞口。

湖廣總志。虛白舉進士不第。辟穀從劉易。陳搏遊。寓武陵崔母家。崔飲以醇酒。一旦歿。殮之。後邑人余安見虛白賣藥揚州市中。賦詩託安遺崔。崔得詩。啓殮視之。乃知屍解。

石仲元

仲元字慶宗。宋初桂林七星山道士。以能詩名。楊徽之守湘源。大加稱賞。目爲玉方響。有桂華集。

陽朔道中

平原翠削萬瓊瑰。頓轡塵沙眼暫開。文網牽人寧底急。未妨得意看山來。

句

石壓筍斜出。岸懸花倒生。以上桂林府志。

沈廷瑞

廷瑞、筠州高安人。玉筍山道士。

別僧昭瑩

南北東西路。人生會不無。早曾依閣阜。又卻上元都。雲片隨天闊。泉聲落石孤。何期早相遇。樂共煮菖蒲。

郡閣雅談。沈廷瑞。吏部郎中彬之子。棄妻入道。居玉笥山。雍熙二年。上元日。辭道侶。念人生幾何賦。無病而終。遺言於弟子。以畫土宿一幘。度人經一卷。隨葬。後二年。有閣阜山僧昭瑩。于山門相遇。云暫到廬山尋知己。留土宿一幘。及度人經一卷。五言詩一首。爲別。昭瑩到玉笥山話及。方知沈道士已亡。往墳上。見土坼裂尺餘。蓋屍解也。

張無夢

無夢字靈隱。號鴻濛子。與种放。劉海蟾。爲方外友。事陳希夷。多得微旨。久之遊天台。登赤城。廬于瓊臺觀。真宗召對。除著作郎。不受。賜還山。令台州給著作郎俸以養老。有瓊臺集。

天台桐柏觀

天台瀑布落青天。觀在天台瀑布邊。道士祇今燒藥處。仙翁曾是種芝田。龍居古洞遺殘雨。鶴出高巢點破煙。暫別靈谿遊五岳。不知重到又何年。赤城志。

劉遁

贈丁晉公

屢在仙遊亭上醉。仙遊洞裏杳無人。他時鳴鶴歸滄海。同看蓬萊島上春。

古今詩話。丁晉公舊有園在保康門外。園有仙遊亭。仙遊洞。輿道士劉遁往來。遁作詩贈公云云。後南遷。遁往見公于崖州。方思其詩。知爲異人也。

許昌齡

南莊

南莊相見北莊居。更入深山十里餘。幽谷每尋樵徑上。真心還與世情疎。雲中犬吠流星過。天外雞鳴曉日初。昨日有人相問訊。旋將落葉寫回書。

皇朝類苑許昌齡安世諸父早得神仙術杖策居穎陽石唐山歐陽永叔生平不肯信佛老與語豁然有悟嘗手書其詩

申徒有涯

高吟

仲尼非不賢。爲世所不容。嗟嗟同舟子。不識人中龍。溪雪載落梅。寒聲激長松。往來但一嘯。一壺隱塵蹤。

樹萱錄申徒有涯方外之士嘗攜一白瓷瓶自陽羨遊吳中大風雪中脫衣賃舟沽酒斗餘飲畢大吐同載者惡之榜舟者逐之有涯挈瓶登岸倚欄高吟云歌訖跳身入瓶悄然無迹

劉元英

元英號海蟾子

題潭州壽寧觀

醉走白雲來。倒提銅尾裘。引箇碧眼奴。擔著獨壺瓠。自言秦世事。家住葛洪井。不讀黃庭經。豈燒龍虎鼎。獨立郡市中。不受俗人請。欲攜霹靂琴。去上芙蓉頂。吳牛買十角。溪田耕半頃。種秫釀白膠。總是仙家境。

醉眠松陰下，閑過白雲嶺。要去即使去，直入秋霞影。

湖廣總志：劉元英，號海蟾子，初名操，燕地廣陵人。以明經擢第，仕燕主劉守光爲相。一旦忽有道人來謁，自稱正陽子，索雞卵十枚，金錢十枚，以一文置几上，累十卵于錢，若浮圖之狀。海蟾驚歎曰：危哉！道人曰：人居榮樂之場，履憂患之地，其危有甚于此者。復盡以其錢擘爲二，擲之而去。海蟾由此大悟，遂易服從道。宋仁宗天聖九年，遊歷名山，所至多有遺跡。一日于潭州壽寧觀題古詩十韻云云，仍自寫真其傍，撮襟書龜鶴齊壽四字。題云：廣陵閑民劉某書，丹成尸解。至元六年，贈海蟾明悟弘道

君真

羅道成

道成，郴州人。

游嶽

因思靈秀偶來遊，碧玉寒堆萬疊秋。直上太山高處望，根盤連接十餘州。白驃代步若奔雲，閑人所至留詩迹。欲知名姓問源流，請看郴陽山下石。

古今詩話：慶歷中有閑人遊嶽，謁主簿郭及甫，視其刺，羅道成也。自言郴州人，問郴州人言有真人得道，乘白驃行石壁上，迹至今存。

黃希旦

希旦，字姬仲，邵武人。自號支離子，生于仁宗景祐閒，入道本軍九龍觀。熙寧中詔住京師五福宮。

又典太乙宮事年四十二解化有竹堂集

謝人惠星冠

學道多年尙屈蟠。豈勝仙伯贈峨冠。曉簪乍覺星攢頂。夜戴偏宜月滿壇。對鑑寧忘朋友正。避時羞爲利名彈。預思他日雲林下。輕罩紗巾鶴髮寒。

和賈鴻舉移竹

琳房珠館何虛寂。寶砌無塵苔蘚碧。仙翁倚檻靜吟哦。卻憶篔簹拂巖石。勁節虛心守歲寒。未嘗暫變風霜色。移來迢遞不辭遠。深根訝向瑤臺植。漸承春意葉青青。時惹天香煙幕幕。月籠翠影尙蕭疎。露被繁枝纔滴瀝。迎風閑夜擬龍吟。結實他年期鳳食。非才終約老煙霞。此際謬當親采擇。寄言紅紫莫相猜。彼此無情蒙化力。逢時翦拂任他人。沈去葛陂都咫尺。以上竹堂集

歸真子

呈桂州唐秀才

袁州相見又之全。不遇先生道未圓。大抵有心求富貴。到頭無分學神仙。篋中靈藥宜頻施。鼎裏丹砂莫妄傳。待得角龍爲宴會。好來黃壁臥林泉。

古今詩話。唐子正著作。桂州人。治平中赴舉。至全州。途中雇一僕。負重擔。健若飛羽。雖鞭馬疾馳。常去馬百步外。恐其逸去。遂

遣之。其僕即日自全州二千七百里。日午已到。唐州留書驛吏曰。候桂州唐秀才至。即投之。唐月餘到驛。驛吏出書。題云。呈桂

州唐秀才。歸真子封。唯一詩云云。話其狀貌。乃全州僕也。留書之日。乃全州所遣。

日也。治平其爲神物。唐後爲龜。卒。熙寧丙辰。長安。詔寬。唐遇者。乃其所謂角龍也。

陳景元

景元字太虛。白稱碧虛子。建昌南城縣人。神宗朝。爲右街副道錄。賜號真人。

宣和書譜。景元每著書。什襲藏之。有佳客至。必發函。具鉛槧。出客前以求點定。乞歸廬山。詔賜白金。旣歸。行李無他物。百擔皆經史也。所居以道儒醫書。各爲齋館。而區別之。四方學者從其遊。則隨所類齋館。相與校讎。人人得盡其學。而所藏號爲完書。未嘗與俗子將迎。惟相善法雲。寺釋法秀。人比之廬山。陸脩靜交惠遠也。所役二奴。一曰黃精。一曰枸杞。一時大臣如王安石。王珪。喜與之遊。嘗與蔡卞論書。至歐陽詢曰。世皆知其體方。而莫知其筆圓。卞頗服膺。

臨化作

昔之委和。今之蛻質。非化非生。復吾真宅。宣和書譜。

李陶真

陶真不知何許人。熙豐閒游武夷。好吹笛。諸道士招飲于雲房。陶真皆赴。而諸房笛聲。一時同發。後寓修于建平之通仙巖。一日留詩別衆。不知所往。

絕句

毛竹森森自剪裁。試吹一曲下瑤臺。當塗不遇知音聽。袖拂白雲歸去來。崇安縣志。

周貫

貫膠東人。熙寧元年。至豫章石頭寺。屍解。

冷齋夜話。周貫者。不知何許人。自號木雁子。治平熙寧閒。往來西山。日酣飲。畜一大瓢。夜以爲溺器。工作詩。詩成癖。嘗宿奉新龍泉觀。半夜隄門。道士驚問其故。曰。偶得句耳。因使口誦貫以手指畫。吟曰。彈琴傷指甲。蓋席損髭鬚。是夜寒甚。貫以席自覆。

耳，故

答人

八十西山作酒仙，麻鞵軋斷布衣穿。相逢甲子君休問，太極光陰不計年。

冷齋夜話

題虛白觀

在筠州上高縣

出郭十餘里，籃輿試初程。山高雲氣重，野曠煙光輕。斷石絡樹根，欹崖溜泉聲。行行款道字，一徑掌樣平。仙隱記甘羅，觀名取莊生。寶藏絢金碧，仙佩飛瑤瓊。簷鐸自相語，龕燈弄微明。出門境界寬，一笑大江橫。踰躄白羽衣，孤鶴松梢鳴。

瑞州府志

郭行

行字思誠，不知何許人。舉進士不第，遂學道，不食，唯飲酒。馬默知郟之項城縣，行訪之，一見如舊。云與祕丞同隱華山，來時默官祕丞也。後行死，期年有人過華陰，見行附書并詩，與默發其墓，唯杖屨而已。

寄馬默祕丞

汶上懽然喜再逢，爲言相憶白蓮峯。死生決定歸真性，歲月休交改舊容。漫把文章添野錄，柰何官爵自天鍾。南山記得登臨處，閑卻煙雲千萬重。

陶朱新錄

邢仙老

詩贈晚學李君

日轉篷窗影漸移，羅浮舊隱到多時。瀛洲伴侶無消息，風撼巖前紫桂枝。

玉照新志：熙寧辛亥，聞李侯事，忘其名，以供奉官爲汾州管界巡檢。一日捕盜入九疑山，深歷巖洞，遙見嶺中有青煙一點，了然可辨。村民云：居常見之，樵牧皆不能到。李識其處，歸以告同姓李彥高。李君業文，志未就，嘗以養生不死爲意，聞之，卽尋煙處，攀緣而上，有草堂三間。一老人燕坐其中，李問老人姓名，唐末人，避世來此，姓邢，名字不必問，指面前二小池，乃有竹筒，作刻漏狀，曰：從來甲子日辰，吾盡知之，所不知者國姓年號耳。李因告以熙寧天子姓名，傳序年月，仙老頷之而已。數日復往，因授李以內丹真訣，臨別書一絕，題云：詩贈晚學李君。

高 坦

留別句容簿

巖下相逢不忍還，狂歌醉酒且盤桓。仇香莫問神仙事，天上人閒總一般。

西溪叢語：熙寧閒，句容簿至茅山，遇道人高坦，被髮跣足，與簿劇談，飲酒終日，書一詩留別而去。

李斯立

斯立居舒州靈仙觀，常從蘇軾游，年踰八十始卒。

句

巖溜連雲凍，溪梅帶雪香。安慶府志。

黃知微

知微字明道，江州人。元豐閒居廬山太平宮，號養正先生。

句

溪雲拂地送殘雨，谷鳥向人啼落花。九江府志。

王文卿

文卿麻姑口道士。

麻姑壇

漉酒巾籠五岳冠，嬾攜琴鶴上朝端。丹房晝睡煙霞煖，紫府夜歸星斗寒。詩就幾教山鬼泣，劍靈那許俗人看。麻姑報道桑田變，一曲仙棊尚未殘。丹霞洞天志。

劉跛子

與客飲市橋

遷客南湘召赴京，輪蹄迎送一何榮。爭如與子市橋飲，且免人閒寵辱驚。

冷齋夜話：劉跛子者，青州人也。挂一拐，每歲必一至洛中看花。館范家園，春盡即還京師。爲人談曠有味。范家子弟多狎戲之。

張丞相召自荆湖時，跛子與客飲市橋，客聞車騎過甚盛，起觀之。跛子手挽其衣，使起飲。作詩云：子姻家許中復之內，乃趙

驥參政之孫女。云我十許歲時，見劉跛子來覓酒飲，笑語而去。計其壽百四

五十許，嘗詣于京師新門張婆店三十年，日坐相國寺東廊，人無識之者。

李伯祥

伯祥、眉山矮道士。見百斛明珠。

句

夜過脩竹院。醉打老僧門。

能改齋漫錄。蘇黃門云。東坡先生稱眉山矮道士。好爲詩。格不能高。往往有奇句。可喜也。

三朵花

絕句

戴花三朵鎮長春。誰識元中不二門。醉裏自傳神似活。終當不老看乾坤。

夷堅志。房州異人。或云姓李氏。常戴紙花三朵入市。能作詩。皆神仙異談。自能寫真。東坡常作詩詠之。郡人稱三朵花先生。猶記其一絕。

徐守信

守信。海陵人。少孤。役于天慶觀。嘉祐四年。天台道士余元吉來遊。示惡疾。守信事之無倦。忽于溺器得丹砂餌之。自是常放言笑歌。日誦度人經。絕粒至數日。爲人言禍福如影響。發運使蔣之奇。以經中有神公受命。普掃不祥之語。呼曰神公。自是人以神翁目之。徽宗召入。言事多驗。賜號虛靜沖和先生。年七十有六卒。賜大中大夫。給葬用四品禮。厝城東響林原。弟子苗希頤。衰次其事。

爲語錄

陸游家世舊聞。元符中。哲宗嘗遣密問聖嗣。神翁曰。吉人君子。吉人者。上名也。于是召至都下。上用太宗見陳搏故事。御繖。襦。即便殿。以賓禮接之。秦州志云。神翁役天慶時。常持一帚。供掃除。後響林方洲仙源霜節亭。請處。多生帶竹。宛然叢筍。

絕句

汲汲光陰似水流。隨時得過便須休。兒孫自有兒孫計。莫與兒孫作馬牛。徐神公語錄。

獻康王詩

牡蠣灘頭一艇橫。夕陽西去待潮生。與君不負登臨約。同上金鼈背上行。

輟耕錄。章安張善初云。初。宋高宗在潛邸日。秦州徐神翁能知前來事。羣閣言于徽宗。召至。以賓禮接之。一日獻詩云云。及兩宮北狩。匹馬南渡。建炎庚戌正月三日。帝航海次臨海縣之章安鎮。灘淺閣舟。落帆于鎮之福濟寺前。以候潮。顧問左右曰。此何山。曰。金鼈山。又問此何所。曰。牡蠣灘。因默思神翁之詩。乃徒步登岸。見此詩在寺壁間。題墨若新。方信其爲異人也。

陳應祥

應祥字知明。西安人。政和中。試修文輔教科。授道至元素大夫。凝神殿校籍。有詩集。

西興晚望

晚色催吟思。江風掠斷霞。亂鳥投岸木。幽鷺集汀沙。月出海門近。人歸渡口斜。會須操柂艇。隨處是天涯。

劉下功

下功字子民，濱州安定人。築環堵于家之後圃，不語不出者三十年。徽宗聞其名，召之不起，賜號高尙先生。靖康之變，不知所終。

寶退錄：子民六歲，誤觸甕碎，家人更譙之，神色自若。曰：俟釘校者來當全之。復譙其妾，曰：人破尙可修，矧甕耶？語未絕，釘校者至，相與料理。頃之如新。嘗云：常人以嗜欲殺身，以貨財殺子孫，以政事殺民，以學術殺天下後世，吾無是四者，豈不快哉。

答外兄王子常問修行之術 王名衣，官侍郎。

非道亦非律，又非虛空禪。獨守一畝宅，惟耕已心田。寶退錄。

張景端

景端字子仁，嗣漢二十九代天師。大觀初，贈葆真先生。

題梅山

作尉南昌日，投書北闕頻。忠言不悟主，直節恥爲臣。漢室多災異，吳門念隱淪。掛冠忘寵辱，蒙袂出埃塵。虹屈英雄氣，鷗羣自在身。永懷三洞訣，高謝九江春。擇地開仙館，看雲翦壽巾。元臺秋步月，虛室夜凝真。無夢生芳草，留年養大椿。碧茸香不斷，青鳥性偏馴。太液刀圭就，中黃道路新。武夷空墜馬，郁木竟棲神。絳節雖朝帝，靈波尙濟民。一名傳舊史，千古事嚴禪。瑞氣生仙藥，清風付羽人。壇遺金鼎像，井鎖玉華津。地接洪厓府，溪通劍水濱。鶴歸雲抖擻，龍起石鱗皴。已悟身爲患，元期德有鄰。青山不忘我，今日是天親。
梅仙事實

張繼先

繼先字嘉聞。嗣漢三十代天師。崇寧中。賜號虛靖先生。

天師世家云。崇寧四年。召繼先建醮內廷。因密奏赤馬紅羊之兆。請修德。靖康丙午。之變。其言始驗。還山題脩然亭壁曰。赤帝御龍行未伏。姮娥分月入深山。人莫能測。

遊洞霄

洞霄深處日棲真。仙子親曾此致身。鳳闕有人來獻禮。溪聲山色愈增新。洞霄詩集。

曹道沖

道沖南岳羽流。

題謝先生白雲菴

桃源洞口武陵人。跳出紅塵二十春。但喜白雲深有趣。不知青眼近來親。丹砂已向坤爐伏。玉汞先從坎鼎烹。活計一張焦尾外。碧壇三尺禮星辰。南岳總勝集。

王介

介七閩羽客。

洞霄宮

飄飄遼鶴去難尋。野客重來歎復吟。許邁林中丹竈冷。郭文山上白雲深。南陵事跡都非昔。北嶺歸期直到今。珍重玉京無限意。待將功節養高岑。洞霄詩集。

皇甫介

介無爲軍道士。

洞霄宮

大滌雲深日月遲。羽人曾作帝王師。鼎中絳雪成千日。巖下幽花占四時。玉仗已乘鸞鶴去。青山難使鬼神移。人閒萬事惟閑好。山頂誅茅待幾時。洞霄詩集

黎師侯

師侯字道華。臨川人。入道。學詩于謝無逸。與曾季狸裘父文慧大師惠嚴同時。以詩鳴。號臨川三逸。有頤菴集。

門外

門外黃塵尺許深。癡兒抵死競浮沈。誰知一寸茅簷日。天付閑人值萬金。詩家鼎鑿

明水寺

寒日荒荒野外昏。亂山深處訪祇園。一條澗水穿龍洞。十里松陰蔽寺門。衲子茹蔬憐鶴瘦。吾儕飲酒作鯨吞。夜闌笑語喧空闊。驚起棲鴉過別村。西江詩話

游道士

道士饒州人。

書假簿

相別來來一百秋。幻泡重作古人游。紫泥白雪尋常事。何苦人閒說不休。

今是堂手錄。太學禮遠齋。饒州一人。遇游道士。道士本里人。化去已多年。一日來客位相訪。約同人請假歸齋。假簿中有詩一絕。乃道士所書也。

葛道人

句

百轉已休鶯哺子。三眠初罷柳飛花。

竹坡詩話。宣和中。錢塘有葛道人。以業屨爲生。一日爲寺僧修屨。口中作吟哦聲。僧訝而問之。曰。今日偶得句耳。

木廣漠

廣漠、和州道士。

自咏

百萬人中隱。一身深如勺。水在滄溟。獨醒自負賢人酒。天闊難尋處士星。照影自憐湖水碧。高吟贏得蜀山青。城南老樹如相問。不枉翻空過洞庭。

費袞梁溪漫志。雍孝聞蜀人。崇寧間廷試對策。力詆時政闕失。駁放後。雖授以右列。然卒不仕。浪迹山林。遂遇異人。得道。政和末。變姓名爲道士。入內說法。徽宗謂其得林靈素之半。因賜姓木。更名廣漠。竟不知其爲孝聞也。

文星落處天地泣。此老已亡吾道窮。才力謾趨生仲達。功名猶忌死姚崇。人閒便覺無清氣。海外何人識古風。平日萬篇誰愛惜。六丁收拾在瑤宮。

玉照新志。秋浦朱去奢。謂雍孝聞自海外量移池州以卒。嘗有詩云。官田種植陶元亮。私釜生塵范史雲。至今郡人猶傳誦之。孝聞沒後和州道士亡其姓名。冒而爲孝聞。走江淮間。其才亦不下孝聞。有弔項羽廣文云。無守陵之總帳。有照夜之寒缸。過東坡墓題詩云云。宣和初至京師。遂得幸。祐陵謂其人可及林靈素之半。錫姓名木廣漢。至紹興中猶寓會稽之天長觀。明清尙及識之。

羅浮黃野人

歌詩

雲來萬嶺動。雲去天一色。長嘯兩三聲。空山秋月白。

西清詩話。黃野人。葛仙弟子。或云葛仙之鍊。樵川棲山煉丹。野人隨之。葛既仙去。留丹柱石閒。野人自外至。得一粒。服之爲地行仙。近有人遊羅浮。宿留巖谷閒。中夜見一人。身無衣而紺毛。覆體意必仙也。乃再拜問道。其人了不顧。但長嘯數聲。響振林

木。歌詩

云云。

裴道人

歌

好酒喫三盞。好花插一枝。思量今古事。安樂是便宜。

泉州府志紹興中有人自稱江東裴道人頭戴通草花行歌于市一日于北山石嵌中端坐而逝

盛曠

曠字元放武林人紹興中入道赤松觀高宗召見賜號至樂先生

獨吟

刊名紫簡羣魔賓扶桑暘谷奏玉晨控鶴三素輔翊宸敢忘南岳魏夫人

金華山志

陳田夫

田夫字耕叟居南岳九真洞老圃菴緝南岳總勝集隆興改元自序

題朱陵洞白雲堂

我愛瀟湘境朱陵後洞天白雲堂裏客青草渡頭眠小艇牽紅鯉幽池種白蓮願真堪此地風月兩依然

南岳總勝集

金梁之

梁之字彥隆休寧人兩浙提刑受長子以蔭爲奉新尉一旦若狂惑者不滿秩棄歸自是袒跣垢汗走歛之墟落動旬月不食夜臥往往有光樞密朱樸一見則曰是八百仙之一也直以金丹動盪故耳晚年多食大黃棲止無常處自稱野仙每云我當以八月死幸毋焚我淳熙元年八月十二日夜半起坐揮扇而逝年六十有一葬城陽山立壇其上後有自蜀見之者爲攜家問歸蓋尸

解云。

洪杏庭金野仙傳同郡士人朱南一字德修瀟灑閑逸至老不娶野仙贈詩有云寄語月溪未逸士他年同賞水仙花野仙沒二紀南一下世士友率葬正在野仙墓後山中水仙正開其前知類如此

答郡守趙師夔

王侯門戶嬾開顏。斗洒千錢一笑閒。無雪可欺青檜老。有天難管白雲閑。丹霄作客曾騎鶴。紫府爲家不買山。京口相逢又相別。隻琴孤劍幾時還。

郡侯雪天開宴卽席以填字韻索詩

昨夜嫦娥弄玉織。也應搦月作花鈿。爲嫌梅影太清瘦。幾片飛來疎處填。以上新安志。

贈郡士張夢錫赴南宮試

秧針刺水麥鋒齊。漠漠平沙白鷺飛。盡道春光已歸去。清香猶有野薔薇。

新安志夢錫下第歸授徒他邑望窗外綠秧如針白鷺飛過徘徊驚訝而籬間薔薇正開悉如詩中所云

黃居萬

瀑布

龍梭織處人難見。地軸舒來尺莫量。定是水仙王性好。逐時裁去補滄浪。

娛書堂詩話道士黃居萬

瀑布一絕亦有形容之工

楊介如

介如字固卿豐城人開禧閒遊邊塞畫策不售遂隱黃冠後入閣阜山有隱居集

句

酒量春吞海詩肩夜聳山

西江詩話介如嘗主清江柏堂觀一日諸文士集觀中唱酬介如蓬寶垢衣坐其側句至朗吟云云座皆驚服

章至謙

至謙號清隱道士

九日和子美韻

九日登高眼界寬羽衣雲集盡清歡黃花滿泛淵明酒白髮仍簪子夏冠庭下流泉趨澗急座閒清氣逼人寒不須更問明年健但向眉頭鬢角看洞霄詩集

陳良孫

良孫道號寢虛先生童年學道隱跡吳山事見趙汝湜九鎖步虛詞引

雪中浴冷泉示諸友

風鼓空林雪蔽山身如鐵石不知寒塵埃豈是相隨物付與溪流出世閒洞霄詩集

許翁翁

偶作

我疑麋鹿是前身。九十餘年作隱淪。飄瓦御風離碧落。虛舟隨水到紅塵。無恩可報空磨劍。有道欲傳難得人。回首孤山無限好。不如歸去任天真。

雲麓漫鈔。堯人許翁翁。少隸軍籍。以功補官。遇異人。棄家入襄漢山。中學道。乾道中來臨安。爲史丞相治脾痛。一鍼而愈。常有詩云。

王思明

思明、餘杭洞霄宮道士。自號竹菴。曾求陸放翁爲本宮碑。

聞蟬

變化南風裏。超然濁得清。一枝藏去穩。兩翼蛻來輕。呼吸飽珠露。吟哦漱玉笙。秋林如罷唱。無處問虧成。

洞霄詩集。

吳洞明

洞明、餘杭洞霄宮道士。自號芝坡。

和章清隱山居

物外無寒暑。從教歲月深。虛閑渾屬我。寵辱不驚心。貧樂知書味。詩豪借酒吟。山居何所有。萬籟奏清音。

洞霄詩集。

龔文煥

文煥、餘杭洞霄宮道士、自號菊巖。

山中

白日幽情愜，閑門到者稀。嗜茶和月煮，採藥帶雲歸。春樹餘花落，天壇獨鶴飛。年華自來往，慵換薜蘿衣。

洞霄詩集

貝守一

守一、餘杭洞霄宮道士、自號月溪。

冬晴晚步

浮雲初斂夕陽斜，路入江村四望賒。木厭霜濃頻脫葉，梅嫌春小未開花。翩翩過雁摩晴漢，隱隱孤帆趁落霞。欲壯吟懷沽斗酒，野田多處少人家。

洞霄詩集

朱真靜

真靜、餘杭洞霄宮道士、自號雪崖。

石室菴夜坐

青燐寒焰弄微明，燈與幽人一樣清。案上黃庭渾懶看，時聞敗葉打窗聲。

洞霄詩集

龔大明

大明、餘杭洞霄宮道士、號山隱。

南湖

梅霖初歇水平湖。湖上青山展畫圖。更著樓臺相掩映。風流端不減西湖。洞霄詩集

徐仲淵

仲淵大滌山凝神齋高士。

清隱齋飲酒

暖風薄雨輕煙散。晴日游絲柳絮亂。竹窗午夢啼鳥驚。松軒晚飲幽人喚。一壺碧酒如春濃。萬斛羈愁若冰泮。興來索筆漫題詩。碧桃花下綸巾岸。洞霄詩集

舒道紀

題浩然觀

澄心坐清境。虛白生林端。夜靜笑聲出。月明松影寒。絳霞封藥竈。碧竇澱齋壇。海樹幾回老。先生基未殘。詩林萬選

趙元清

元清號石泉。金華赤松觀道士。有松花集。

題江湖偉觀

鳳舞龍飛王氣蟠。兩都賦在一闌干。伍員不死江湖壯。西子如生越水寒。春日百花連上苑。秋風落葉滿長安。錢唐占盡東南美。河洛何人著眼看。金華詩粹

陳孟陽

孟陽閣阜山道士

答清江錢大尹問閣阜山中景

形如閣阜對清江。吳漢神仙古道場。玉像靈多民受賜。天書歲久墨猶香。絳霞密鎖靈仙館。碧霧輕籠正一堂。蒼蘚爛斑雙鯉石。寒泉澄湛九龍塘。著衣臺上三冬暖。鳴水亭前六月涼。擣藥鳥聲喧夜榻。昇天馬跡印西岡。葛憩源深生異草。凌雲峯峻染瑤光。丹井雖存人杳漠。松巢空見鶴飛翔。屏糝水墨誇陶弼。門斷塵埃憶孟昌。風來松檜笙簫地。春入園林錦繡鄉。箇中自少紅塵到。閑裏惟知白晝長。景物敢吟成實錄。願憑賢宰一稱揚。閣阜山志

葛長庚

長庚字白叟。又號白玉蟾。閩清人。家瓊州。入道武夷山。嘉定中詔徵赴闕。館太乙宮。封紫清明道真人。有海瓊集。

採蓮舟

葭蒲滿蕩起晴煙。總屬霜鷗雪鷺天。一片紫菱分十字。中間放過採蓮船。

登樓秋望

凭徧朱闌醉已蘇。樓前眼纈望中疏。漢陽草樹看來短。淮岸漁家淡欲無。薄暮鴉翻千點墨。晴空雁草數行書。多情庾亮吟魂遠。風泛蘆花秋滿湖。

中秋月白鷺按西湖遊覽志作得月樓

千崖爽氣已平分。萬里青天輾玉輪。起向錢唐江上望。相逢都是廣寒人。

題桐柏觀

仙翁夜來扣林壑。約我明朝過南岳。石壇對坐話松風。鶴唳一聲山月落。

午飯羅漢寺

林閒一徑似驚蛇。中有禪關隱紫霞。煙鎖蒼松遮寺額。風搖翠竹撼簷牙。客來寂寞盤香穗。飯罷從容瀹茗花。到此徘徊歸去晚。夕陽掛樹一聲鴉。

初至桐州

夜半江風吹竹屋。起挑寒燈憐影獨。荒雞亂啼思轉多。黠鼠嘯躍眠不熟。舊曲聲情覺淒涼。故園心眼時斷續。何當牽犬臂蒼鷹。錦帽貂裘呼蹴踘。以上海瓊集

黃春伯

春伯號天谷。

訪白玉蟾值其出題壁三言。

怪訪怪。怪不在。茅君山來相待。

絕句

半篙春水一蓑煙。抱月懷中枕斗眠。說與時人休笑我。英雄回首卽神仙。以上劉後村詩話

夏元鼎

元鼎字宗禹永嘉人號雲峯散人又號西城真人

絕句

崆峒訪道至湘湖萬卷詩書看轉愚踏破鐵鞵無覓處得來全不費功夫

蓬萊鼓吹附錄元鼎博極羣書屢試不第應實許二帥幕出入兵閒至上饒夜感異夢弃官入道至南岳祝融峰遇赤城周真人求其指示乃大悟因題詩云云所著有陰符經講義三卷圖說一卷崔公藥鏡箋一卷今永嘉有夏仙里云

楊至質

至質字休文號勿齋閣阜山道士淳祐中敕賜高士右街鑒儀主管教門公事著有竹宮表制太乙宮代言之文也

茅山

玉肺浮空已字山五門不鎖洞天寬紫花可餌秋尋朮紅燄難埋夜見丹畫出一牛方水草飛來三鶴各峯巒仙蹤寂寞高風遠誰爲先生指額癩茅山志

李德真

客崇安寄蕭小山太博

宦清只有著書忙六館歸時客滿堂芍藥待吟班已峻梅花曾賦筆猶香夜瞻北斗星河近晴倚東樓嶺樹長別日未深情不淺雪風吹老孟襄陽

武林春遊卽事

風光如此莫傷春。雲樹煙花一色新。杜宇不啼眞解事，帝鄉誰是肯歸人。以上詩林萬選

王克功

克功字德成，號漫翁。

詠柳

春到枝枝是綠絲，秋來葉葉是愁眉。灞橋何限經行者，不記尋花繫馬時。全芳備祖

劍浦思歸

韶華客裏一番老，自歎此生行路多。獨上危樓望鄉國，闌干倚徧奈愁何。詩家鼎鑪

思友

孤坐忽太息，拂衣臨長風。天高夕月冷，木脫秋山空。良晤匪易得，好懷難再同。思君不可見，心逐孤飛鴻。

梅僊山

芒屨支藤上翠微，長松影裏扣柴扉。石壇丹竈蒼苔冷，天闊風高鶴不歸。以上詩林萬選

董嗣杲

嗣杲字明德，號靜傳。宋季入道，孤山四聖觀，改名思學，字無益。有西湖百詠。

雨中宿洞霄

青青九鎖山，步步聽潺湲。雨重精神倦，雲深意緒閑。禽聲依石樹，泉溜出巖關。落落仙蹤在，何能見大還。

洞霄詩集

西湖百詠存十九首

環碧園 在豐樂樓北柳洲之側恭聖仁烈楊太后宅園

繞舍晴波聚釣仙。五龍池畔柳洲前。清虛不類侯家屋。輪奐曾資母后錢。三面軒窗秋水觀。四時簫鼓夕陽船。攬將山北山南翠。獨有黃昏得景全。

東西馬塍 在溜水橋北羊角埂是也。河界東西。土脈宜栽花卉。園人工于種接。仰此爲業。閒有園亭。不過養種。而塍有土神。

廣額扁作馬城。

土塍聚落界西東。業在澆畦奪化工。接死作生滋夜雨。變紅爲白借東風。幾家衣食花姿異。兩岸園池地勢同。病叟扶鋤勸晚照。前身莫是橐駝翁。

水仙廟 在水月園西。廟創梁大同年間。號錢唐龍君廟。錢氏繼請額。尊碑尙存。乾道中重建。寶慶閒郡守別建蘇隄上。乃謂

舊廟有視湖遊焉。牽連遷就之說。梁大同時。今幾傳矣。

雲翹雨佩有遺仙。香火寧隨世代遷。廟始大同年紀著。額頒乾化敕碑鐫。鳳閑露壘荒瑤草。龍溼秋衣翦玉蓮。隄上翫新誰述記。卻無門外一泓泉。

孤山 在西湖中。孤山路西。建炎前多有民屋。閒以四菴院。山背皆花園及冢隧。山之東爲林和靖隱廬。就葬其下。紹興中建延

祥觀。奉四聖香火。獨留和靖一墓。民屋菴院。悉徙山北。觀東爲園。累朝臨幸。寶祐二年。分地之半。建西太乙宮。陳朝柏在和

靖墓南。

標緜蓬萊擁翠寒。百年營取屋千閒。黃庭殿盡煙霞老。瀛嶼堂幽日月閑。水泛花陰藏瑩路。牆分柳色護

仙關林家梅家陳家柏。萬古流芳鎮此山。

西林橋在孤山西。卽古之西村喚渡處。

水竹雲山拱畫圖。因懷喚渡想東都。雨餘晴竦銜西照。風遏春船入裏湖。闌曲祇供遊子凭。林閒今有野人無。隔牆莫是神仙宅。紅白梅花五百株。

岳鄂王墓在棲霞嶺口。葬名將太師忠武鄂王岳飛于此。

將軍魂夢遶旌旗。偃月謀成尙忍言。一旦風波誰左袒。八陵荆棘自中原。更無雁帶邊頭信。惟有天知地下冤。鬱鬱棲霞霞外樹。墓門不掩雀巢喧。

玉泉 在淨空寺內。齊建元中。靈悟大師曇超卓菴。演法于錢唐靈苑山。龍君遠來聽法。又爲撫掌出泉。砌以方池。畜大金魚。

有景定開周棟記。

南齊事蹟已消沈。曾立苔碑記古今。一老出泉猶撫掌。此僧演法欲傳心。樹頭龍過家家雨。池面魚游尾尾金。行客不須閑照影。要知澤物溥春霖。

西溪 在靈隱寺山背。居人能力其勞。漁樵耕牧。各遂其業。楊蟠詩云。爲愛西溪好。長憂溪水窮。山源春更落。散入野田中。

漁樵耕牧自成村。就屋編籬古意存。出塢野雲多曲折。過橋溪水半清渾。一逢白壁書香社。幾見朱闌障墓門。地利最饒人事簡。山家還有別乾坤。

九里松 在一字門裏。舊名袁公松門。唐開元閒。刺史袁仁敬夾道種松。錢唐吳說書九里松三字揭之。紹興中。思陵幸天竺。

回。易以奎扁。終不稱聖意。旨令金填說書重揭之。至今尙存。

開元刺史擅清風。九里新栽夾道松。屋頂自生濤浪勢。根頭誰覓茯苓蹤。行春橋掩雲千態。一字門封翠幾重。人訝金填吳說筆。不知此筆遇高宗。

冷泉亭

在飛來峰下。唐右司元黃建。刺史白居易撰記。按古誌靈隱澗。古許由嘗飲于此。盧全父詩云。問山何以名靈隱。山曰當年隱許由。

小朵峯前玉鏡寒。幾回倚杖聽潺湲。箕公飲澗非凡水。慧理呼猿是此山。亭角靜依金刹古。樹身涼臥石闌閑。無因可洗人閒熱。時御清風照影還。

香林

在下天竺後塔西。日月尚左。舊名香林洞。又名香桂林。今直屬香林。

日月巖頭古翠埋。綿雲深隔洞門開。蒼藤隨石無根活。靈杞何年有種栽。氣凝野煙疑麝過。暖熏山雨誤蜂來。空亭誰領幽芬坐。雪鶴同行損綠苔。

鍊丹井

在下竺西廊下。葛仙翁有丹在井水。可以療病。

稚川曾此倒靈瓢。闌上銀牀壓整腰。丹氣騰空知幾轉。神光射屋起中宵。有茶可品春煎細。何疾能治曉汲遙。萬古仙蹤應不泯。轆轤聲落病僧寮。

眞珠泉

在龍山秦崇政院內。開運中建。顯德五年。院東泉湧擊聲。則泉出如貫珠。景祐中。元絳名之。州家取爲酒名。雷峰路

口張府園有泉。亦同此名。

泉光四散駭猿猱。迸起平池點滴高。誰欲斗量徒積夢。人將瓶汲肯辭勞。聲隨夜雨穿疎箔。名逐春風入小槽。別有雷峯峯下圃。一泓墮沒在蓬蒿。

甘園 在淨慧寺相對齋宮之西，舊爲甘內侍園。淳祐中名湖曲園，咸淳中屬謝府。名新園，園倚雷峰，有四，面堂淳祐郡守所，瓶堂下接翠芳園船坊。

內官園 遼傍齋宮，楊柳隄南翠幾重，四面堂虛凌上界，五層塔近壓中峯，徑連湖水行幽草，廊接風亭臥偃松，鄰岸御舟空望幸，深坊長日鎖飛龍。

勝景園

在雷峰路口東，開禧間韓侂胄園，陸放翁作南園記，韓遊村莊曰惜無天吠，隨有效之者，韓敗，園屬官名慶樂園，淳祐中撥賜嗣榮王，易今名。

名花 嫋嫋草纖纖，臺榭隨幽逐勝添，十樣結亭環水樹，一碑述記臥風簷，梅關橋落停檣鑰，射圃樓空失塚簾，向日相傳誰學吠，村莊畢竟出沽帘。

長橋 在勝景園東，在昔此橋跨水甚長，橋亭且壯麗，日墮月寒，皆民居矣，橋西有寺，南對鳳皇山，又有澄水關，東抵清波門，湖

橋此最短，而長名自若。

南港 虛明架石梁，寺樓鐘落幾斜陽，相傳亭跨危基壯，誰想橋橫古道長，澄水關荒沙草碧，清波門近市塵黃，鳳皇山在闌干外，玉抹煙屏鷺一行。

慈雲嶺

在方家峪西南嶺下，爲郊臺，嶺頂可望江湖，石上刻後唐篆字云：梁單闕之歲，興建龍山，至泔灘之歲，開慈雲嶺，至今尙存。

疊疊流雲步步苔，九霄紫氣限蓬萊，後唐刻石初開路，南宋郊天別築臺，慰眼江湖空歲月，傷心陵寢墮塵埃，桃花爭趁春風老，又引遊人一度來。

包家山

在慈雲嶺南冷水峪多桃花名桃花關關門上揭蒸霞二字拜郊臺在山之西籍田園在山之南

綺霞蒸日透林梢一簇南山尙姓包冷水峪邊苔色老冲雲樓下樹陰高園鄰古道傳耕籍臺倚青城想拜郊欲趁桃花尋隱去關門無輪不須敲

聚景園

在清波門外阜陵致養北宮拓圃西湖之東斥浮屠之廬九曾經四朝臨幸繼以諫官陳言出郊之令遂絕園今荒地惟柳浪橋花光亭存

鑾鈴遺響輦遺蹤萬景曾經聚此中寺宇有名基址散君王無逸讌遊空橋昏柳浪龍舟雨亭冷花光雉扇風臺沼已無春又老萬年枝上夕陽紅以上西湖百詠

聶碧窗

碧窗江西人京口天慶觀主嘗爲龍翔宮書記

赦詔至有感

乾坤殺氣正沈沈又聽燕臺降德音萬口盡傳新詔好累朝誰念舊恩深分茅列土將軍志問舍求田父老心麗正立班猶昨日小臣無語淚霑襟

哀被虜婦

當年結髮在深閨豈料人生有別離到底不知因色誤馬前猶自買胭脂

詠北婦

雙柳重鬢別樣梳醉來馬上倩人扶江南有眼何曾見爭卷珠簾看固姑以上輟耕錄

褚伯秀

伯秀號雪巖錢唐人宋末天慶觀道士以清苦節行聞

送玉海宗師還山

湖澗天教十載閑玉經功就勝居壇驚塵天目妨龍臥晚歲華陽望鶴還入詠五噫丹闕近會心三笑畫溪寒世緣歷盡仙緣熟坐斷陪眞向上關茅山志

善基道人以下無名道流

絕句

爛柯眞訣妙通神一局曾經幾度春自出洞來無敵手得饒人處且饒人

西溪叢語蔡州寔信縣有碁師閔秀才說嘗有道人善碁凡對局率饒人一先後死于寔信託後事于一村叟數年後叟爲改葬但空棺衣衾而已

無名道人

絕句

偶到皇都玩月華笙歌留我醉流霞勸君不用悲塵土天上人間只一家

輿車志宣和開元夕州西酒樓一道人來索酒痛飲初不持錢將去題詩壁間云云乃探懷取藥拭杯成黃金以償酒直明日喧傳都下禁中聞之以金十兩易其杯去

無名道人

絕句

瑤峯一別杳難期。消渴從教醉枕欹。不信丹青能畫得。五更燈暗月來時。

侯鯖錄云。一道人敗道後作。

人敗道後作。

吳山道人

留藥籃中詩

一騎如龍送客歸。銀髮綠耳步相隨。佳人未許輕分別。不是仙翁豈得知。

閑窗括異志。三山曾陟。嘗館陳氏七載。音信不通。有道人自吳山來。謂之曰。子思鄉之切。何不歸。陟曰。水陸三千。幾時得到。道人翦紙爲馬。令合眼上馬。以水噴之。其疾如風。祝曰。汝歸毋久留。須臾到家。門戶如舊。妻令入浴。易新衣。陟曰。我僕去。妻曰。纔歸便去。何不念父母妻子乎。陟便上馬而行。所騎馬足折。驚寤。身在書館中。隨身衣皆新製者。道人亦不見。惟留一藥籃。中有詩云。

羅浮山中客

題壁

雲意不知滄海。春光欲上翠微。人閒一墮千劫。猶愛梅花未歸。

谷音咸淳中。客有戴烏方巾著鞵。往來羅浮山中。見人則大笑。反走。三年不言姓名。它日醉歸。忽取煤書壁云云。

無名髻仙

絕句

鳴梢疊葉響颼颼。枕底寒聲爲客留。野鶴不來山月墮。獨眠滋味四更秋。

因學齋雜錄。前宋士人山行。于絕壁人跡不到處。見有題詩者云。少前遇
野人坐大石上。意其爲詩者。欲前揖。忽不見。余謂仙人亦未能忘情者邪。

洛浦道士

道士鳳陽人。修真于鼎州蘇溪靈巖山。化去。

絕句

一水穿崖走碧沙。崖前樛木偃龍蛇。分明便是桃源洞。不見溪中流落花。湖廣總志。

宋詩紀事卷九十一

錢唐 厲鶚 緝
歙 吳震生 勘定

乾康

乾康零陵人。以詩爲齊己所稱。至宋乾德中猶存。

經方干舊居

鏡湖中有月處士後無人。荻筍抽高節。鱸魚躍老鱗。詩話總龜

賦殘雪

六出奇花已住開。郡城相次見樓臺。時人莫把和泥看。一片飛從天上來。

詩話總龜乾德中左補闕王仲知永州乾康捧詩見仲觀其老醜曰豈有狀貌如此能爲詩乎時積雪方消命康詠之仲驚異待以殊禮

延壽

延壽字冲立號抱一子杭州人棄吏出家吳越忠懿王延住永明寺著宗鏡錄開寶八年入滅賜

號智覺禪師

閑居

閑居誰似我，退跡理難過。要勢危身早，浮榮敗德多。雨催蟲出穴，寒逼鳥移窠。野徑無人翦，疎窗入薜蘿。
宋高僧詩選

永牙

永牙居圭峯，賜紫。

贈英公大師

吾宗何事獨稱雄，今昔名高繼古風。王右軍書得智永，李陽冰篆付英公。墨研天電煤疑絕，硯琢端溪石欲空。珍重眞蹤千載後，誰來三日看無窮。
英公十八體篆書碑

墨池編釋夢英衡州人，效十八體書，尤工玉箸書。至大梁，太宗召之，簾前賜紫服，去游終南山，師號宣義。

正緣

句

柳牆高于花，怒飛方可至。奇哉游夏徒，吐辭作雉翅。
送人謁柳開 歷代吟譜

仲休

仲休一作仲林，越僧。李文靖公以名上，賜號海慧大師。有天衣十峯詠，錢易爲序。

雲門寺

鶴唳峯前路，行行世慮消。羅交藏石竇，雲破露山椒。樹老形多怪，人閑色似驕。誰同訪諸謝，烟草滿溪橋。

宋高僧詩選

贊寧

贊寧、德清高氏子。出家杭州龍興寺。吳越武肅王署為兩浙僧統。賜號明義。宋太宗召對滋福殿。詔修高僧傳。咸平初加右街僧錄。又著內典集外學集。至道二年示寂。諡曰圓明大師。

寄題水月禪院

在洞庭山縹緲峯下。梁大同四年建。山有無礙泉。

參差峯岫畫雲昏。入望攀蘿濁浪奔。震澤涌山來北岸。華陽連洞到東門。日生樹挂紅霞脚。風起波搖白石根。聞有上方僧住處。橘花林下採蘭蓀。吳郡志。

居天柱山

四野豁家庭。柴門夜不扃。水邊成半偈。月下了殘經。雖逐諸塵轉。終歸一念醒。未知斯旨者。萬役盡勞形。
灑奎律髓。

福全

福全、金鄉沙門。

自詠

生成盞裏水丹青。巧盡工夫學不成。卻笑當時陸鴻漸。煎茶贏得好名聲。

清異錄。沙門福全。生于金鄉。長于茶海。能注茶。幻茶成一句詩。並點四甌。共一絕句。泛乎湯表。小小物類。唾手辦耳。檀越日造門。求觀湯戲。自詠云云。

法常

法常、河南釋。

句

優游麴世界，爛漫枕神仙。

清異錄：河南釋法常，性英爽，酷嗜酒，無寒暑，風雨常醉，醉即熟寢，覺即朗吟云云。

定諸

定諸、晉江僧，曾楚公會與爲方外友，有去華集。

詠鸚鵡

罩向金籠好羽儀，分明喉舌似君稀。不須一向隨人語，須信人心有是非。泉州府志。

希晝

希晝、劍南人，九僧之一。

歐公詩話：九僧詩集今不傳，當時有進士許洞，俊逸士也，嘗會諸僧分題，出一紙，約曰：不得犯此一字，其字乃山水風雲竹石花草雪霜星日禽鳥之類，諸僧閣筆。

鄭樵通志藝文略：九僧選句圖一卷。

書惠崇師房

詩名在四方，獨此寄閑房。故域寒濤闊，春城夜夢長。禽聲沈遠木，花影動回廊。幾爲分題客，殷勤掃石牀。

寄題武當郡守吏隱亭

郡亭傳吏隱，閑自使君心。卷幕知來客，懸燈見宿禽。茶烟逢石斷，碁響入花深。會逐南帆使，乘秋寄此吟。

留題承旨宋侍郎林亭

翰苑營嘉致，到來山意深。會茶多野客，啼竹半沙禽。雪溜懸危石，碁燈射遠林。言詩素非苦，虛荅侍臣心。

以上瀛奎律髓

懷廣南轉運陳學士

極望隨南斗，迢迢思欲迷。春生桂嶺外，人在海門西。殘日依山盡，長天向水低。遙知仙館夢，夜夜怯猿啼。

禪藻集

句

天長來月正，木末度猿稀。遊雁蕩曉天金馬路，晚歲石霜心。贈句學士山日秋光短，江虹晚影低。寄人寄禪關樹老，乞食寒城荒。贈關上人楊文公談苑。

保暹

保暹金華人，九僧之二。有處囊訣。

書杭州西湖涉公堂

孤舟孤鶴與孤雲。湖上深居自不羣。高臥可能容一榻。青山西岸且平分。宋高僧詩選。

早秋閑寄宇昭

窗虛枕簟明。微覺早涼生。深院無人語。長松滴雨聲。詩來禪外得。愁入靜中平。遠念西林下。相思合慰情。

秋徑

杉竹清陰合。閑行意有憑。涼生初過雨。靜極忽歸僧。蟲迹穿幽穴。苔痕接斷棱。翻思深隱處。峯頂下層層。
以上瀛奎律髓。

天廚禁燔云。自然令人愛
悅。不假人言。然後爲貴。

文兆

文兆南越人九僧之三。

巴峽聞猿

倚棹望雲際。寥寥出峽情。心如無一事。愁不在三聲。帶露諸峯迴。懸空片月明。何人同此聽。徹曉得詩成。
宋高僧詩選。

宿西山精舍

西山乘興宿。靜興寂寥心。一徑松杉老。三更雨雪深。草堂僧語息。雲閣磬聲沈。未遂長棲此。雙峯曉待尋。
瀛奎律髓。

行肇

行肇天台人九僧之四。

泛若邪溪

霧雨牽野情。孤舟遂茲賞。積水連遠空。落日垂萬象。岸迴雲獨隨。山轉泉更響。望望極寒源。猶言放輕槳。

宋高僧詩選

酬贈夢真上人

禪舍因吟往。晴來坐徹宵。春通三徑晚。家別九江遙。巢重禽初宿。窗明葉旋飄。住期應未定。謝守有詩招。

自注青社凌使君以詩見招

送文光上人西游

高木墜殘葉。關河入遠心。嵩游忘楚夢。華近識秦音。塔古懸圖認。碑荒背燒尋。幾思興替事。獨上灞陵吟。

以上瀛奎律髓

句

定錫樵停斧。窺人鳥立樣。送僧江聲鼉背去。帆影斗邊飛。送人之鄞江楊文公談苑

簡長

簡長沃洲人九僧之五。

張景序云。上人之詩。如發于寂寞。漸進于冲和。盡出于清奇。卒歸于雅靜。

夜感

無眠動歸心。寒燈坐將滅。長恐浮雲生。奪我西窗月。宋高僧詩選。

送僧南歸

漸老念鄉國。先歸獨羨君。吳山全接漢。江樹半藏雲。振錫林烟斷。添瓶澗月分。重樓上方定。孤狖雪中聞。瀛壖律髓。

送方仲荀

行客心如何。借劍爲君歌。雨昏山未開。花盡春無多。欲知貧別情。涕淚空滂沱。

晚次江陵

楚路接江陵。倦行愁問程。異鄉無舊識。多難足離情。落日懸秋樹。寒蕪上廢城。前山不可望。斷續暮猿聲。以上續藻集。

寄雲水禪師

千峯聳寒翠。古刹凌秋雲。高人斂幽跡。世事何由聞。禪石抱蒼蘚。祖衣含淨氛。有時溪上步。自與鳥猿羣。

雲門志略。

句

烟壘沈寒角。霜空擊怒鷗。送人歸寧州。楊文公談苑。

惟鳳

惟鳳、青城人。號持正。九僧之六。有風雅拾翠圖。

王隨序云。持正大師。一章一聯。皆出乎清新。發

乎清逸。賦象可以披圖畫。嚮英可以潤金石。

弔長禪師

霜鐘侵漏急。相弔晚悲濃。海客傳遺偈。林僧寫病容。漱泉流落葉。定石集鳴蛩。回首雲門望。殘陽下遠峯。

瀛奎律髓。

句

草檄飛燕壘。降幡入漢宮。邊將。岸盡吳山出。潮平越樹低。送人歸天台。寺近東溟日。山連北固春。照甘露招提。

家遠知琴在。時清賣劍歸。送陳處士。歷代吟譜。

惠崇

惠崇、淮南人。一作建陽人。九僧之七。有集。

錢易序云。步驟高下。去古人不

遠。釋子之詩。可相等者。不易得。

清波雜誌。崇非但能詩。畫亦

有名。世謂惠崇小景者是也。

書林逸人壁

詩語動驚衆，誰知慕隱淪。水烟常似暝，林雪乍如春。薄酒嬾邀客，好書愁借人。有時行藥去，忘卻戴紗巾。
宋高僧詩選

池上鷺分賦得明字

雨絕方塘溢，遲徊不復驚。曝翎沙日暖，引步島風清。照水千尋迴，棲烟一點明。主人池上鳳，見爾憶蓬瀛。

湘山野錄：寇萊公延詩僧惠崇于池亭，探圖分題。萊公得池上柳青字韻，崇得池上鷺明字韻。崇默遶池徑，馳心杳冥以搜之。自午及晡，忽以二指點空微笑曰：此篇功在明字，凡五押之，俱不倒方今得之。公曰：試請口舉。崇舉詩云云。公笑曰：吾之柳功

在青字，已四押之，終未厭，不若且罷。

訪楊雲卿淮上別業

地近得頻到，相攜向野亭。河分岡勢斷，春入燒痕青。望久人收釣，吟餘鶴振翎。不愁歸路晚，明月上前汀。
源登律髓

白撰句圖

河分岡勢斷，春入燒痕青。書楊雲卿別業陰井生秋早，明河轉曙遲。長信詞地形吞蜀盡，江勢抱蠻迴。送遠上人
四遊嶺暮春，猿急江寒白鳥稀。江行晚泊歸禽動疎竹，落果響寒塘。上谷相公池上作野人傳相鶴，山吏學彈琴。
贈陳六少府香淺冰生井，宵分月上軒。夜坐掩門青檜老出定白髭長。贈凝上人浪經蛟浦關，山入鬼門寒。送遷

客遺偈傳諸國留真在一峯緙絲公舊序河冰堅渡馬塞雪密藏鷗塞上久別年顏改相逢夜話長喜長公

多年不道姓幾日旋移家隱者鳥歸杉墮雪僧定石沈雲宿東林寺露寒金掌重天近玉繩低上翰林楊學士

著書驚日短彈劍惜春深柳氏書齋探騎通番壘降兵逐漢旗上王太尉露下牛羊靜河明桑柘空田家秋夕

林斷城隍出江分島嶼迴舟行鎖城山月上吹角海鷗驚寄梅蘇州卷幔來風遠移牀得月多宿楊侍郎東亭

白浪分吳國青山隔楚天送程至空潭聞鹿飲疎樹見僧行游隱靜寺劍佩明山雪旌旗溼海雲送錢供奉巡警

曠野行人少長河去鳥平梅鼎臣河亭月高山舍迴霜落石門深宿蒙公山齋霜多秦木迴雲盡漢山孤送盧經

西歸夜閑潮動舸秋迴月臨城灤梁夜泊葉落風中盡蟲聲月下多崔仰秋居行縣山迎舸論兵雲繞旂贈裴使

君繁霜衣上積殘月馬前低早行磬斷蟲聲出峯迴鶴影沈秋夕移家臨醜石租地得靈泉書韓退之屋壁秋

近草蟲亂夜遙霜月低秋夕懷長公海鷗聽舜舞山鬼醉堯觴觀宴鄉老中食下林狖夜禪移豕狐贈素上人扇

聲猶泛暑井氣忽生秋晚夏殘月楚山曉孤煙江廟春江行早發梵容分古像唐語入新經宿翻經館清少卿房

鶴傳滄海信僧和白雲詩題王太保道院寒禽棲古柳破月入微雲秋夕懷汪白花漏沈山月雲衣起海風贈白

上人樓中天姥月座上杜陵人喜陳助至人歸岡舍迴雁過渚田遙冬日野望山色臨巴迴江流入流清送人牧

榮州湘雲隨雁斷楚路背人遙春申道中松風吹髮亂巖溜澗基寒贈李道士境閑僧渡水雲盡鶴盤空樓霞寺

古路隨岡起秋帆轉浦斜林通河亭禽寒時動竹露盡忽翻荷楊祕監池上嵐重琴基溼風長枕簟寒魏野山亭

離磧雁衝雪渡河人上冰塞下夜梵通雲竇秋香滿石叢寄白閣能上人關河雙鬢白風雪一燈青陝西道中

殺氣生龍劍威風動虎旗送防秋楊將軍落潮鳴下岸飛雨暗中峯瓜洲亭子月躔黃道迴春入紫微深賀劉舍

人寒燈催臘盡。曉角喚春歸。除夜雁行沈古戍。鷗影轉寒沙。幽井道中景霽雲迴合。秋生樹動搖。送僧歸天台
亂水僧頻過。荒林鶴不還。過陳搏田居露館濤驚枕。空庭月伴琴。宿橫江館馬渡冰河闊。鷗盤嶺日高。維那道中
驚蟬移古柳。鬪雀墮寒庭。國清寺秋居松風傳夕磬。溪霧擁春燈。書平上人山房霓旌搖曙景。風吹繞春雲。觀南
郊天仗。坐石雲生袖。添泉月入瓶。贈義省上人萬國無刑治。三邊不戰平。昇平詞暝鶴棲金利。秋僧過石橋。國清
寺雲殘松埽石。風動鶴歸松。呂氏西齋風暖鳥巢木。日高人灌園。劉參幽居竹風驚宿鶴。潭月戲春鷺。楊都官池
上圭竇先知曉。盆池別見天。書方居士壁月露疎寒柝。雲濤閃畫旂。送陳舍人巡撫鶴驚金刹露。龍蟄玉瓶泉。宿
齊上人禪齋。暄風生木末。遲景入泉心。春日寇公贄池上河來天上闊。雲度月邊輕。七夕海人來相鶴。山狹下彈
琴。贈王道士畫鷁浮秋浪。金鏡響夕雲。送孫荆州丹楓映郭迴。綠嶼背江深。江城晚望危溜含清瑟。飛花點玉
觴。題王太保山亭朱旗凌雪卷。畫角入雲吹。送李秦州孤雲還靜境。遠籟發秋空。畫上人西齋圍碁分雪石。汲井
動金沙。李太傅山莊井含春氣碧。樓轉夕陰清。宮中詞鳥暝風沈角。天清月上旗。送吳袁州斜吹鳴金錫。歸雲擁
石牀。寄巖公古戍生煙直。平沙落日遲。塞上拂石雲離帶。嘗茶月入鐙。嗣上人遠嶼迎橋出。寒林帶岸迴。舟行
來時雲擁衲。別夜月隨筇。送延上人路橫岡燒斷。風轉浦帆斜。馬嬾淮亭劍靜龍歸匣。旗閑虎繞竿。上殿前戴太
保。畫逢名嶽橫。琴憶古賢高。譚書齋雲陰移漢塞。石色入秦天。太一山地遙羣馬小。天闊一鷗平。塞上送人
江花凌霰發。山溜入池深。范溶園池長風躍馬路。小雪射鷗天。獵騎古木風烟盡。寒潭星斗深。高略書院渡河
風動旆。巡部雨霑車。送段工部河北轉運青嶺雜記。

歐陽公詩話。惠崇詩多佳句。有百句圖刊石于長安。

宇昭

宇昭、江南人。九僧之八。

塞上贈王太尉

嫵姚立大勳。萬里絕妖氛。馬放降來地。鵬閑戰後雲。月侵孤壘沒。燒徹遠蕪分。不慣爲邊客。宵笳懶欲聞。

幽居卽事

掃苔人迹外。漸老喜深藏。路僻閑行遠。春晴晝睡長。餘花留暮蝶。幽草戀殘陽。盡日空林下。孤禪念石霜。

贈魏野

別業唯栽竹。多閑亦好奇。試泉尋寺遠。買鶴到家遲。藥就全離母。詩高祇教兒。未能終住此。共有海山期。

以上瀛奎律髓。

懷古

懷古、峩眉人。九僧之九。

送田錫下第歸寧

念別孤親去。無成萬里歸。算程芳草盡。去國故人稀。棧閣浮雲險。刀州入望微。前期有公薦。莫負老萊衣。

宋高僧詩選。

寺居寄簡長

雪苑東山寺。山深少往還。紅塵無夢想。白日自安閑。杖履苔痕上。香燈樹影閒。何須更飛錫。歸隱沃洲山。
瀛奎律髓

句

霧開離草迴。風逆到花遲。詠蝶。深雪偶談。

清 豁

清豁、泉州張氏子。住漳州保福院。刺史陳洪進表奏。賜號性空禪師。太平興國元年示寂。

歸山吟寄友

聚如浮沫散如雲。聚不相將散不分。入郭當時君是我。歸山今日我非君。四朝詩。

守 端

蠅子透窗偈

爲愛尋光紙上鑽。不能透處幾多般。忽然撞著來時路。始覺平生被眼瞞。禪藻集。

遇 賢

遇賢、俗姓林氏。宋初、長洲東禪寺僧。

中吳紀聞。遇賢飲酒無算。且多靈異。鄉人謂之林酒仙。口中可容兩拳。能自圖其形。無毫釐不相似。好賦詩。亦有清婉者。

雜詩

金鐘又聞泛。玉山還報頽。莫教更漏促。趁取月明迴。

門前綠樹無啼鳥。林下蒼苔有落花。聊與東風論箇事。十分春色屬誰家。

楊子江頭浪最深。行人到此盡沈吟。他時若向無波處。還似有波時用心。中吳紀聞。

德聰

德聰、姓仰氏、姑蘇人。太平興國三年。結廬松江佘山。有二虎爲之衛。名大青小青。天禧元年。趺坐而逝。

自題月軒

軒前轆轤轉冰盤。軒裏詩成徹骨寒。多少人來看明月。誰知倒被月明看。松江府志。

智圓

智圓、字無外。錢唐人。俗姓徐。自號中庸子。居孤山瑤院。與處士林逋爲鄰友。有閑居編。

湖居卽事寄仁姪

講退臨流獨倚筇。塵埃無處寄閑蹤。青山歸去心常在。白髮生來事轉慵。門徑草深梅雨歇。像龕燈暗水烟濃。相知唯有搖松客。時辱音書慰病容。

寄棲白師

深隱空林下。清幽絕外緣。雨窗封嶽信。苔井瀘秋泉。門靜來沙鳥。庭閑噪晚蟬。凭欄獨相憶。殘日下遙天。

贈林逋處士

深居猿鳥共忘機。荀孟才華鶴氅衣。滿砌落花春病起。一湖明月夜漁歸。風搖野水青蒲短。雨過閑園紫蕨肥。塵土滿牀書萬卷。元纁何日到松扉。

贈聞聰師

澹然塵慮絕。禪外苦風騷。性覺眠雲僻。名因背俗高。水烟蒸紙帳。寒髮澀銅刀。幾宿秋江寺。閑吟聽夜濤。

挽歌詞

莫談生滅與無生。謾把心神與物爭。陶器一藏松樹下。綠苔芳草自縱橫。以上閑居編。

遵式

遵式字知白。天台葉氏子。居下天竺寺。著淨土懺法。金光明。觀音諸本懺儀。行世。號慈雲懺主。天聖中滅度。紹興中賜號懺主禪慧大法師。有天竺靈苑集。

寄劉處士

度月阻相尋。應爲苦雨吟。井渾茶味失。地潤屐痕深。鳥背長湖色。門閑古樹陰。想君慵更甚。華髮晝方簪。

酬蘇屯田西湖韻

雨餘殘景照漁家。漁子鳴榔徹郡衙。今夜相呼好垂釣。平湖新雨漲蒹葭。以上宋高僧詩選。

酬伉上人

鳥外清閑極。誰能更似君。山光晴後見。瀑響夜深聞。拾句書幽石。收茶踏亂雲。江頭待無事。終學棄人羣。

用 晦王衢 李識

用晦吳僧與魏野善

游解城中條山聯句并引

解城之南出五里抵中條山山有絕壁介立儼若峽束緣岸泝流似有人跡琅琊王衢趙郡李識處士魏野江東僧用晦披榛索徑深入數百步止于泉石之涘道路未遠塵事且隔雲鳥風物鳴動左右而山語野笑樂生盡日因相與濯足命爲聯句詩一章凡二十句用晦書于巖壁時淳化五年秋八月三十日

萬仞雲根泉清冷濯我足用晦森森灑爪甲凜凜寒肌肉衢來初自試探坐久頻舒縮野觸開浪花白踏破苔痕綠衢肺腑亦澄澈形影相照燭用晦忽罷避遊魚未歸妨渴鹿野懼濁遠泥沙就陰憐草木衢浸潤易調暢狎玩難拘束識欲伐我未能先起人何速野此會高且閑願繼漁父躅用晦 鉅鹿東觀集

悟清

悟清宋初河北僧

句

鳥歸花影動魚沒浪痕圓青瑣高議

印 粲

句

見說下朝無一事。小池栽葦學僧家。贈徐鼎臣常侍。歷代吟譜。

文喜

文喜，湘南人。

句

一向亂雲尋不得。幾番臨水待歸來。失鶴。歷代吟譜。

守恭

句

而髮人來絕。銜花鹿去多。佛跡峯。楊文公談苑。

智仁

智仁，一作智淳。與九僧同時。

留題雲門寺

秦峯千古寺。豈易得躋攀。一夢幾回到。片心長此閑。溪光涵石壁。秋色露松關。靜室孤禪後。寒鐘夜滿山。宋高僧詩選。

句

寒聲病葉落。曉色凍雲開。溪居。路遙無去伴。山疊有啼猿。僧歸天台。吟窗雜錄。

晦 幾

滕王閣

檻外長江去不回。檻前楊柳後人栽。當時唯有西山在。曾見滕王歌舞來。菊坡叢話。

嚶 微

贈翬上人

京寺別來久。高齋近海隅。引禪秋磬動。照像夜燈孤。愛水開新沼。思山挂舊圖。他時如結社。許繼遠公無。
宋高僧詩選。

休 復

句

日暮長安道。秋深太白峯。送道士西遊。楊文公談苑。

尙 能

送簡長師陪黃史君歸江右

相送隨旌旆。離情亦萬端。霜洲楓落盡。水館月生寒。接話嘗茶徧。聯詩坐漏殘。歸期在巖壑。郡邸想留難。
宋高僧詩選。

句

西風隨雁急。寒柳向人疎。送人關河虎符重。殿閣獸樽閑。送孫大諫知永興。古寺山光裏。重城海氣圍。送僧歸四

明泣珠泉路通關市種玉仙翁寄版圖 江聲齧背雨帆影斗邊風以上皇朝類苑

遇臻

遇臻越州楊氏子嗣法天台韶國師

秋夜坐

秋庭肅肅風颺颺寒星列空蟾魄高摺頤靜坐神不勞烏窠無端吹布毛禪藻集

子熙

登京口古臺夜望

適意江天外孤吟上古臺海門帆正泊京口雁初來露冷蟾輪轉河秋斗柄回故山千里隔歸思幾悠哉

宋高僧詩選

用文

上慧日大師

京寺居來久終年獨掩扉吟餘花落硯定起月生衣樹隱宮禽迴鐘鄰禁漏微朝賢盡知己休夢錦城歸

旅中言懷

舉目無相識離懷聊自傾道孤諳旅況貧甚見時情淨社芙蓉老荒齋蟋蟀鳴終當舊山去免更競浮名

以上宋高僧詩選

居昱

居昱、錢唐郭氏子。學詩于林逋。

句

松聲和雨聽。山色帶雲看。赤城志。

照寂

照寂、日本僧。號圓通大師。景德中入貢。三司使丁晉公悅之。爲言姑蘇山水奇秀。因留止吳門僧寺。

以黑金水瓶寄丁晉公

提攜三五載。日用不曾離。曉井掛殘月。春爐釋夜澌。鄱銀難免侈。萊石易成虧。此器堅還實。寄公應可知。
楊文公譏死。

士可

士可天聖開闔僧。

送僧

一鉢卽生涯。隨緣度歲華。是山皆有寺。何處不爲家。笠重吳天雪。鞵香楚地花。他年訪禪室。寧憚路歧賒。

西清詩話。此非
食肉者能到也。

法泉

法泉隨州時氏子住建康蔣山賜號佛慧。

悼趙清獻

仕也邦爲憲歸歟世作程人閒金粟去天上玉樓成。慧劍無纖缺冰壺徹底清。春風穀水路孤月照雲明。
春花集

文瑩

文瑩字道溫錢塘僧及識蘇子美欲挽致于歐陽公瑩辭不往老子荊州之金鑾寺有湘山野錄玉壺清話渚宮集。

寶積寺小雨

老木垂紺髮野花翻麴塵明霞送孤鶩僻路少雙鱗天近易得雨洞深無早春山祇認來客曾是洞中真。
宋高僧詩選

秀登

送小白上人歸華頂

瀑濺安禪石秋雲鎖碧層一峯如卓筆幾日策孤藤樹偃前朝蓋星輝下界燈超然歸此處心已契南能。
送貫微歸天台

秋歸赤城寺幽興難相同迹與片雲合心向萬境空傾耳霜樹猿吹衣瀑布風後夜越溪上夢斷寒雲中。
以上宋高僧詩選

祕演

祕演、山東僧。

歐陽公序云。祕演與曼卿交最久。曼卿隱于酒。祕演隱于淨。屠皆奇男子也。曼卿稱祕演之作。以爲雅健。有詩人之意。

淮上

危橋當古寺。閑倚喜同僧。極浦霽秋雨。扁舟明夜燈。風沈人語遠。湖漲月華升。萬事空凝念。其如總不能。

書光化軍寺壁

萬家雲樹水邊州。千里秋風一錫遊。晚渡無人過疎雨。亂峯寒翠入西樓。以上宋高僧詩選。

山中

結茅臨水石。澹寂益閑吟。久雨寒蟬少。空山落葉深。危樓乘月上。遠寺聽鐘尋。昨得江僧信。期來此息心。

瀛台律髓。

重顯

重顯字隱之。遂州李氏子。居明州雪竇寺。皇祐中。賜號明覺大師。有瀑泉集。

獅子峯在廬山。

踞地盤空勢未休。爪牙安肯混常流。天教生在千峯上。不得雲擎也出頭。

僧寶傳重顯工翰墨作爲詩句追慕禪月休公嘗游廬山棲賢時誤禪師居焉簡嚴少接納顯蕪直不合作獅子峯詩譏之

暮冬感懷寄瑞巖禪師

雲水繞松檻遲遲結清淺病眼時嬾開幽情況難遣故人久相別飛文屢慚覲仰謝十二峯分明月如翦

天竺送僧

雪霽蓮峯頂孤禪起石牀向時機自絕異域路空長啼狖衝寒影歸鴻見斷行後期無定跡煙水共茫茫

千里不來

不見古君子因循又隔秋浮生多自擲好事更誰留碧巘高沈月寒雲靜鎖樓宗雷何處是白鳥下汀洲

以上潘炎集

送俞居士歸蜀

何處深棲役夢頻青城拋卻數溪雲如今老大歸難得祇寫情懷遠送君

宋高僧詩選

九堦

允堪錢塘人辨博精通撰律宗十二部經解經傳并法門贊序等文慶曆中賜號眞悟大師

句

始生巖谷畔早有月中香九歲答客試小桂西湖高僧事略

契嵩

契嵩，字仲靈，藤州人。姓李氏。嘉祐中進輔教編，賜號明教禪師。退老于杭州靈隱寺。有鐔津集。

林閒錄：嵩明教初至，開先主者命掌書記，笑曰：我豈爲汝一杯羹否？湯耶，乃去之。西湖坡公所云契嵩禪師多嘆人未嘗見其笑者是也。

古意

風吹一點雲，散漫爲春雨。灑子松柏林，青蔥枝可取。持此歲寒操，手中空楚楚。幽谷無人來，日暮意誰與。

寄月禪師

聞道安禪處，深蘿任隔溪。清猿定中發，幽鳥座邊棲。雲影朝晡別，山峯遠近齊。不知誰問法，雪夜立江西。

湖上晚歸

人閒薄遊罷，歸興尋舊隱。春崖行未窮，夕陽看欲盡。嵐光山際淡，天影水邊近。自憐幽趣真，清吟更長引。

書南山六和寺

青蔥玉樹接溪岑，臺閣凌虛地布金。行到白雲重疊處，水聲松韻淡人心。以上鐔津集。

曇穎

曇穎，錢塘丘氏子。出家龍興寺，與歐陽永叔、刁景純游。嘉祐四年，示寂于金山龍游寺。

僧寶傳：師神情秀特，于書無

所不觀，爲詞章多出學語。

小溪

小溪莊上掩柴扉。雞犬無聲月色微。一隻小舟臨斷岸。趁潮來此趁潮歸。宋高僧詩選。

惠璉

別趙莘老

十里青山照眼。一篷疎雨催詩。記取江邊作別。烟村梅子黃時。

舟行寒江曲港

揚帆出浦又入浦。轉盼順風還逆風。蘆葉蕭蕭兩岸合。蓼花細細一川紅。鷗兼野鷺衝行棹。浪挾汀沙打臥篷。行李向來吾自決。漫將晴雨問漁翁。以上宋高僧詩選。

惟晤

惟晤字冲晦。嘗與契嵩倡和。

遊天竺寺

天寒雨細日將暮。泥滑難禁策馬還。砂穴吐泉鳴泱泱。竹叢歸鳥語關關。聊希謝客須穿屐。莫羨支公獨買山。方外論交情未淺。願陪投老白雲閒。

酬東山禪師同公濟冲晦遊天竺兼呈伯周禪老

平昔詩禪友契深。更來人外事幽尋。雨餘澗壑流寒響。歲晏檉杉老翠陰。袒跣不妨陶令醉。風流多效洛生吟。山翁解榻延清賞。未放前賢勝竹林。以上饒津集附。

有需

有需莆田陳氏子得法于乾公部使者陳覺民延住福州鼓山退居石門與陳聘君易偕隱焉
石門歌

吾結草菴蔡溪側四顧峯巒皆峭壁石門千仞鎖天津來者欲登那措足住此菴中是何緣不詩不頌亦
不禪飢來苦菜和根煮疊石爲牀困卽眠日照諸峯陰羃羃負暄孤坐情何適馴伏珍禽趁不飛猿猱捫
我衣中蟲閑搗瘦筇六七尺山行野步扶危力披雲入草不辭勞逢人打破修行窟或停松或坐石靜聽
溪泉漱鳴玉源深洞邃來不休聲聲奏盡無生曲雜羽流商誰辨的五音六律徒敲擊有時乘興上高峯
大笑狂歌天地窄補續高僧傳

寄陳聘君

拂石跏趺樹影寬定回霜月照人寒此時況味誰知得寫與秋藤居士看興化府志

誓元

誓元字無誓嘗與契嵩倡和

次韻奉酬仲靈歲暮還西塢見寄

野步溪流靜源深興未歸晚禽棲雪竹殘霰灑禪衣
放意天涯遠狂吟人跡稀詩成寄我侶清氣動禪扉
鐔津集附

法輝

法輝晉江廣福院僧禪餘以詩自娛與呂縉叔石聲叔陳原道爲同社

題憲師壁

遠浸溪光碧，寒生松檜陰。漁舟驚暮雨，高吹入秋林。泉州府志。

懷璉

懷璉，漳州陳氏子，住明州育王山。仁宗賜號大覺禪師，住持東京淨因院。治平中還山。

林間錄：仁宗皇帝與大覺禪師爲法喜游，和宸翰詞句甚多，然皆蹤跡上語，初不敢出新奇宏妙之言。至觀平日所作，則驚絕之句甚夥。

上仁宗皇帝乞還山

千簇雲山萬壑流，閑身歸老此峯頭。殷勤願祝如天壽，一炷清香滿石樓。

冷齋夜話：大覺禪師學外工詩，舒王少與遊，嘗以其詩示歐公。曰：此道人作肝臟饅頭也。舒王不悟其意。歐公曰：是中無一點菜氣。璉蒙仁廟賞識，留住東京淨因禪院甚久，嘗作偈乞還山云云。

擇璘

擇璘，剡中寶積寺僧。

寄禮法師

寺枕滄溟上，門長掩寂寥。定回花漏斷，講徹獸烟消。入檻泉聲細，當軒岳色遙。何時重會席，南望路迢迢。
宋高僧詩選

詠杜鵑花

蠶老麥黃三月天。青山處處有啼鶻。斷崖幾樹深如血。照水晴花暖欲然。三歎鶴林成夢寐。前生園苑覓神仙。小山拄頰愁無奈。又怕聲聲聒夜眠。剡錄。

無夢

無夢、鄂州僧。

書木牌詩

身爲車兮心爲軾。車動軾隨無計息。交梨火棗是誰無。自是不除荆與棘。身爲客兮心爲主。主人平和客安堵。若還主客不安寧。精神管定辭君去。

墨客揮犀。無夢多化府。畿村落開。

手持木牌一面。正書詩二首云云。

善暹

善暹、臨江軍人。初參雪竇顯。曾居座下。後住開先寺。

辭顯禪師題壁

不是無心繼祖燈。道慚未廁嶺南能。三更月下離巖竇。眷眷無言戀碧層。補續高僧傳。

寶磨

寶磨、光黃閒狂僧。年百三十歲。死于熙寧十年。既死。人有見之者。

題逆旅壁

滿院秋光濃欲滴。老僧倚杖青松側。只怪高聲問不應。噴余踏破蒼苔色。茗溪漁隱叢話。

惟政

惟政餘杭僧。有錦溪集。

補續高僧傳。政禪師住功臣山。標致甚高。蔣侍郎堂守錢塘。與師爲方外友。冬不擁爐。以荻花作毯。納足于中。客至共之。好翫月。盤膝大盆中。浮于水上。自旋其盆。吟笑達旦。率以爲常。出入常跨一黃牛。世稱爲政黃牛。

山中作

橋上山萬重。橋下水千里。惟有白鷺鷥。見我常來此。林開錄。

辭侍郎蔣公讌客見招

昨日曾將今日期。出門倚杖又思惟。爲僧只合居巖谷。國士筵中甚不宜。

自題像

貌古形疎倚杖藜。分明畫出須菩提。解空不許離聲色。似聽孤猿月下啼。以上西湖高僧事略。

香林洞

香林接幽洞。香乳無時滴。日暮白雲歸。攀之不可得。宋高僧詩選。

則之

則之字彝老。外岡楊氏子。學詩于西湖順老。學禪于大覺蓮禪師。有禪外集。

早梅

數夢初含雪，孤清畫本難。有香終是別，雖瘦亦勝寒。橫笛和愁聽，斜枝倚病看。朔風如解意，容易莫吹殘。
雪霽觀梅

荒園晚景斂寒烟，數朶清新破雪邊。幽豔有誰能畫得，冷香無主賴詩傳。看來最畏前村笛，折去休逢野渡船。向晚十分終更好，靜兼江月淡娟娟。以上中吳紀聞。

繼 儒

貽顯宗上人

僧閑師更閑，危坐雪堂寒。白日門常掩，紅塵事不干。吟終燈燼落，講罷印香殘。仍欲添佳致，栽松近藥闌。

李養黃谷譚談云：沁水縣榭山寺中，宋石刻九僧詩人

各一首不盡佳，不錄。此刻在治平二年十二月望日。

思 雅

送王山人歸千峯

舊居千萬岑，歸去獨攜琴。物外情難遏，雲中路再尋。花繁溪圃合，柳暗野橋深。想到垂綸處，和苔掃竹陰。

黃谷譚談

惠 渙

送王山人歸隱

山人惟委命，豈戀世塵閒。干祿不得志，移家住遠山。醉眠溪石靜，吟倚草堂閑。到想無餘事，林僧日往還。

黃谷謹談。

靈澄

山居

因僧問我西來意。我話山居不記年。草履祇栽三箇耳。麻衣曾補兩番肩。東菴每見西菴雪。下澗常流上澗泉。半夜白雲消散後。一輪明月到牀前。春花集

顯忠

顯忠贊寧弟子。

白雲莊

門外仙莊近翠岑。杖藜時得去幽尋。牛羊數點烟雲遠。雞犬一聲桑柘深。高下閑田如布局。東西流水若鳴琴。更聽野老譚農事。忘卻人閒萬種心。宋高僧詩選

閑居

竹裏編茅倚石根。竹莖疎處見前村。閑眠盡日無人到。自有清風爲掃門。詩人玉屑

隱岳洞在新昌縣石城山

融結自何時。曾爲幾陵谷。不見昔賢蹤。空遺此巖腹。一徑斷烟榛。千岑老雲木。尋常人更稀。虎豹暗棲宿。紹興府志

清晦

登閣

小閣稱幽隱，登臨眺晚晴。暮雲埋落日，寒樹夾孤城。鳥道穿山色，人烟隔水聲。自憐疎散意，多不計浮名。

宋高僧詩選

祖心

祖心號晦堂，南雄始興郭氏子。少爲書生，出家參黃檗南公，繼其法席。住隆興府黃龍寺。元符三年示寂，賜號寶覺。

客齋詩話：黃龍心禪師，初謁雲峯悅公，留三年，往依黃檗南公，無所得，試閱傳燈，至僧問多福曰：如何是多福？一叢竹曰：一莖兩莖斜，三莖四莖曲，頓覺有省，旋游京師，南還廬山。

退黃龍院作

不住唐朝寺，閑爲宋地僧。生涯三事納，故舊一枝藤。乞食隨緣過，逢山任意登。相逢莫相笑，不是嶺南能。

許彥周詩話：深靜平實，道眼所了，非世間文士詩僧所能髣髴。

元淨

元淨字無象，於潛徐氏子。住持杭州上下二天竺，賜紫衣及辨才號。學徒踰萬人。趙閱道、蘇子瞻、秦少游皆與倡酬。退居龍井聖壽院。

次韻參寥懷秦少游學士

巖棲木食已皤然。交舊何人慰眼前。素與晝公心印合。每思秦子意珠圓。當年步月來幽谷。拄杖穿雲冒夕烟。臺閣山林本無異。故應文字未離禪。

風月堂詩話。東坡題後云。辨才作此詩時。年八十一矣。平生不學。作詩如風吹水。自成文理。而參寥與吾輩詩。乃如巧人織繡耳。

文 彘

文彘號文寶大師。有詩格。

句

十年弓劍爲誰苦。萬里山河不自由。題項羽廟。歷代吟譜。

惠 隆

惠隆。有靈溪集。

句

繞砌淺莎鳴促織。斷檐殘雨挂遊絲。題廢宅。歷代吟譜。

宗 美

宗美。有晉江集。

題延福寺

倚檻寒松偃。連雲一徑橫。就中圖不得。窗戶入江聲。

自題詩集

新集芻蕘六百篇。冥搜疑到不還天。多慙未得騷人旨。虛役身心五十年。

句

浣沙舊曲何人笛。一一隨風到客舟。泊吳江。以上歷代吟譜。

維琳

維琳武康沈氏子。好學能詩。熙寧中東坡居士倅杭。請住徑山。宣和元年崇右道教。詔僧爲德上。皆頂冠師。聚徒說偈而逝。

東坡志林。徑山長老維琳。行峻而通。文麗而清。

問東坡疾

扁舟駕蘭陵。目換舊風物。君家有天人。雌雄維摩詰。我口吞文殊。千里來問疾。若以偈相答。露柱皆笑出。
雲麓漫抄。

題松

大夫去作棟梁材。無復清陰護綠苔。只恐夜深明月下。誤他千里鶴飛來。

補續高僧傳。師居銅山院。有松合抱。縣大夫將取以治解。師知之。命削皮。題詩其上。尉至讀其詩乃止。

省回

省回住南嶽雙峯寺

辭衆偈

九十二光陰分明對衆說。遠洞散寒雲。幽窗度殘月。

五燈會元師於元豐六年九月十七日

坐逝茶毘崗頂不壞上有五色異光

重喜

重喜熙寧中會稽人。少以捕魚爲生。日誦觀世音菩薩不少休。舊不識字。輒能書。又能作偈頌。

絕句

地爐無火一囊空。雪似楊花落歲窮。乞得苧麻縫破衲。不知身在寂寥中。竹坡詩話

句

行到寺中寺。坐觀山外山。遊戴山上方院程守公闢索詩老學菴筆記

曇秀

山光寺

扁舟乘興到山光。古寺臨流勝氣藏。慙媿南風知我意。吹將草木作天香。

東坡題跋予在廣陵與晁无咎墨秀道人同舟送客山光寺客去予醉臥舟中墨秀作詩

靚禪師

題巨商壁

去年巢穴畫梁邊。春暖雙雙遶檻前。莫訝主人簾不卷。恐銜泥土污花顛。冷齋夜話

絕句

春天一夜雨濛濛。添得溪流意氣多。剛把山僧推倒卻。不知到海後如何。

冷齋夜話靚禪師有道老宿也。主筠之三峯。嘗赴供民家。渡溪漲。靚重爲溪流所陷。童子掖至岸。坐沙石間。垂頭如雨。中鷄忽指溪作詩云。後住汝州香山。無疾而化。

日 益

日 益 保寧勇禪師法嗣。

偶作

金谷春光長滿眼。紅藥花梢香爛漫。昨夜西風一陣寒。徧地殘芳落何限。王孫醉倒不知歸。猶向闌邊索

金盞。禪藻集

可 遵

可 遵 福州僧。

佛印元公自京師還過金陵作詩贈之

上國歸來路幾千，渾身猶帶御爐烟。鳳皇山下敲篷詠，驚起山翁白晝眠。

題湯泉

禪庭誰作石龍頭，龍口湯泉沸不休。直待衆生塵垢盡，我方清冷混常流。以上冷齋夜話。

道潛

道潛字參寥，於潛何氏子。與秦觀、蘇軾遊。軾守杭，卜智果精舍居之。軾南遷，坐詩語刺譏得罪，返初服。建中靖國初，詔復祝髮。崇寧末，歸老江湖。嘗賜號妙總大師。有集。

東坡詩話：僕在黃州，參寥自武陵來訪館之東坡。一日夢參寥誦新詩，覺而記兩句云：寒食清明都過了，石泉槐火一時新。後七年，出守錢塘，而參寥始卜居湖上智果院。院有泉，出石縫間，甘冷宜茶。寒食之明日，僕與客泛舟自孤山來謁參寥，汲泉鑽火烹黃燖茶，忽悟所夢詩，兆于七年之前。衆客驚歎，知傳記所載蓋不妄也。

墨莊漫錄：呂溫卿爲浙漕，屢起大獄，復欲網羅參寥。參寥本名墨潛，東坡改之曰道潛。呂索牒勘驗，竟坐刑，還俗編管兗州。

經臨平作

風蒲獵獵弄輕柔，欲立蜻蜓不自由。五月臨平山下路，藕花無數滿汀洲。

續飲傲說：參寥子常在臨平道中賦詩云：東坡一見而刻諸石。宗婦曹夫人善丹青，作臨平藕花圖，人爭影寫。

東園

曲渚回塘孰與期。杖藜終日自忘機。隔林彷彿聞機杼。知有人家在水西。

冷齋夜話道潛性褊。憎凡子知讐。作詩追法淵明。其語有逼真處。曰。數聲柔櫓蒼茫外。何處江村人夜歸。又曰。隔林彷彿聞機杼。知有人家在翠微。時從東坡在黃州。士大夫以書抵坡曰。聞日與詩僧相從。豈非隔林彷彿聞機杼者乎。真東山勝游也。坡以書示潛。誦前句曰。此吾師七字詩號。

秋江

赤葉楓林落酒旗。白沙洲渚夕陽微。數聲柔櫓蒼茫外。何處江村人夜歸。

余初入智果院。蘇翰林率賓客相送者十六人。各賦詩一章。用圓覺經云。以大圓覺爲我伽藍身心。安居平等性智爲韻。得以字。

泰山屹天下。四海同仰止。我公命世英。突兀等于是。胷中廓秋漢。皎絕微雲滓。當年事危言。軒冕如脫屣。正貴知我希。寧慚不吾以。風雲果再符。六翮排空起。一昨厭承明。抗章求迺邈。餘杭古雄藩。比屋富生齒。立談政可成。興不負山水。雍容敦末契。訪我頑且鄙。大旆輝松門。禽援亦驚喜。森森門下士。左右粲珠履。使君道德安。圭角非所恃。輒語如春風。薰然著桃李。今朝眞勝事。千載足遺美。安得筆如椽。磨崖爲公紀。

卜居智果蒼方外

青燈殘篆夜寥寥。門外秋風振葦蕭。慚媿高人能見憶。爲予西望立溪橋。

湖上

去歲春風上苑行，爛窺紅紫厭平生。而今眼底無姚魏，浪蕊浮花嬾問名。
城隈野水綠逶迤，裊裊輕舟掠岸過。欲採芸蘭無覓處，野花汀草占春多。

風月堂詩話：東坡南遷，參寥居西湖智果院，交遊無復曩時之盛。作湖上絕句云：詩既出，遂有返初服之禍。建中靖國間，曾子開明其非幸，始還故服。

口占絕句

寄語東山窈窕娘，好將幽夢惱襄王。禪心已作霑泥絮，不逐春風上下狂。

侯鯖錄：東坡在徐州參寥自錢塘訪之，坡席上令一妓戲求詩，口占云云。一座大驚，自是名聞海內。

夏日龍井書事

雨過千巖爽氣新，孤懷入夜與誰鄰。風蟬故故頻移樹，山月時時自近人。禮樂汝其攻我短，形骸吾已付天真。露華漸冷飛蟲息，窗裏吟燈亦可親。

自憐多病畏炎曦，長夏投蹤此最宜。青石白沙含淺瀨，碧梧蒼竹聒涼颺。雲中雞犬聽難辨，谷口漁樵問不知。斑杖芒屨隨步遠，歸來烟火認茅茨。以上參寥集。

題東坡墨竹贈官妓

小鳳團牋已自奇，謫仙重掃歲寒枝。梢頭餘墨猶含潤，恰似梳風洗雨時。

風月堂詩話坡在餘杭會客以彩牋作墨竹
贈官妓且令索詩于參寥參寥授筆立就

仲殊

仲殊字師利俗姓張氏名揮安州進士因事出家住蘇州承天寺杭州吳山寶月寺有寶月集

東坡志林蘇州仲殊師利長老能文善詩及歌詞皆

操筆立就予曰此僧胷中無一毫髮事故與之游

中吳紀聞殊初爲士人嘗與鄉薦其妻以藥毒之遂棄家爲僧工于長短句東坡先生與之往來甚厚時時食蜜解其藥人號
蜜殊喜作豔詞字草堂嘗以詩箴之竟莫能改一日造郡中接坐之間見庭下一婦人投牒立于雨中守命殊詠之口就一詞

云濃潤侵衣暗香飄砌雨中花色添憔悴鳳驪濕透立多時不言不語厭厭地眉上新愁手中文字因何不倩鱗鴻

寄想伊只訴薄情人官中誰管閑公事後殊自經于枇杷下輕薄子更之曰枇杷樹下立多時不言不語厭厭地

潤州

北固樓前一笛風斷雲飛出建康宮江南二月多芳草春在濛濛細雨中

題李伯時支遁相馬圖

月窟精神不受羈白雲野老太支離當時若也無人識駿骨靈心各自知以上侯鯖錄

訪方子通

多年不見玉川翁今日相逢小榭東依舊清涼無長物只餘松檜養秋風中吳紀聞

黃左丞席上作

瑞麟香暖玉芙蓉。畫蠟凝輝到曉紅。數點漏移銜仗北。一番雨滴甲樓東。夢游黃閣鸞巢外。身臥彤幃虎帳中。報道譙門初日上。起來籠幙杏花風。

龍改齋漫錄黃左丞安中守平江日會客仲殊亦與焉以疲倦先起熟寐于黃堂中及覺日已曛曉矣黃因罰作此詩始放去瑞麟香安中家所造也

京口懷古

一昨丹陽王氣銷。盡將豪侈謝塵囂。衣冠不復宗唐代。父老猶能道晉朝。萬歲樓邊誰唱月。千秋橋上自吹簫。青山不與興亡事。只共垂楊伴海潮。方輿勝覽

慎長老

慎長老廬山圓通寺僧。

和東坡詩韻

東軒長老未相逢。已見黃州一信通。何必揚眉資目擊。須知千里事同風。

蘇文忠公集云。子在筠作東軒記。或戲之爲東軒長老。其婿曹煥往筠。余作一絕句送曹。以戲子。由曹過廬山。出以示圓通慎長老。慎欣然亦作一絕。送客出門。歸入室。趺坐化去。

清順

清順字怡然。杭州西湖北山僧。王荆公愛其詩。東坡晚年亦與之唱酬。

題西湖僧舍壁

竹暗不通日，泉聲落如雨。春風自有期，桃李亂深塢。

竹坡詩話：東坡遊西湖，于僧舍壁間見小詩，問誰所作，或告以錢塘僧清順，即日求得之，一見甚喜，而順之名出矣。余留錢塘七八年，有誦順詩者，往往不逮前篇，政以所見之未多耳。然使止于此，亦可傳也。

十竹軒

城中寸土如寸金，幽軒種竹只十箇。春風慎勿長兒孫，穿我階前綠苔破。

北山垂雲菴

久從林下游，頗識林下趣。縱然綠陰繁，不礙清風度。閑于石上眠，落葉不知數。一鳥忽飛來，啼破幽絕處。
以上詩入玉屑。

宿天竺

昔人不可見，行路多長松。空遺煉丹處，井榦綠苔封。月明還獨宿，白雲下疎鐘。夜半桂子落，不知自何峯。
宋高僧詩選。

書景舒菴壁

大布君能衣，始知蠶口非。冢閒容一榻，身外但三衣。護戒避生草，淨心觀落暉。寂寥能自守，今世固應稀。
瀛奎律髓。

守詮

守詮，一作惠詮，杭州梵天寺僧。

題梵天寺

落日寒蟬鳴，獨歸林下寺。松扉夜未掩，片月隨行屨。唯聞犬吠聲，又入青蘿去。

竹坡詩話：余讀東坡和梵天寺僧守詮詩，嘗喜其清絕過人。晚遊錢塘，始得詮詩，乃知其幽深清遠，自有林下一種風流。東坡雖欲回三峽倒流之瀾，與溪壑爭流，終不近也。

先覺

北窗炙輶，惠先覺最爲東坡。元章所禮，爲人朴野，布衣草履，繩纆欄爲帶。時夜半起，搥其法闢門，索火甚急，知是得句也。惠覺詩渾然天成，無一毫斧鑿痕，雍容閑逸，最有唐人風氣。

題大慈塢祖塔院

北窗炙輶
谷口兩三家，平田一望賒。春深多遇雨，夜靜獨鳴蛙。雲暗未通月，林香始辨花。誰驚孤枕曉，濤白捲江沙。

思聰

思聰字聞復，孤山僧。

竹坡詩話：聞復杭州孤山僧，東坡倅杭，令和參寥子昏字韻，大加稱賞。大觀政和間，挾琴游梁，日登中貴人之門，久之遂還俗，爲御前使臣。方其將冠巾也，蘇叔黨因浙僧入都，送之詩云：試誦北山移，爲我招琴聰。詩至，已無及矣。

句

千點亂山橫紫翠，一鉤新月挂黃昏。
竹坡詩話

枇杷花發天欲雪，黃雀不飛枝上寒。

雪浪齋日記高子勉

喜吳僧聞復此句

南越

石佛寺

松竹行纔盡，香城絕世塵。倚巖開半殿，鑿石見全身。鐘鼓中天曉，煙花上界春。出門重稽首，願值下生晨。

宋高僧詩選

楚巒

青城山觀

靜見門庭紫氣生，前山嵐靄入樓青。玉壇醮罷鬼神喜，金鼎藥成雞犬靈。巖下水光分五色，壺中人壽過千齡。何當一日拋凡骨，騎取蒼龍上杳冥。

宋高僧詩選

嬾雲

田橫墓

荒冢臨歧尙隱然，春風吹綠草芊芊。牧兒亂唱黃昏後，猶似悲歌薤露篇。

河南府志

道英

道英，俗姓胡，泉州人，嗣覺照琦禪師。

絕句

南北東西住險巖。古巖寒桂冷依依。無人到我經行地。明月清風擬付誰。補續高僧傳。

文政

文政南嶽僧。

題勝業寺

山鳥無凡音。山雲無俗狀。引得白頭僧。時時倚藜杖。南嶽總勝集。

用孫

浮槎山 在廬州。古傳自海浮來。有梵僧過此。曰此善闍一峯也。梁武帝女爲尼于山。建道林寺。歐陽公有記。

山爲浮來海莫沈。蕭梁曾此布黃金。梵僧親指善闍窟。帝女歸傳達磨心。地控好峯排萬仞。澗餘流水落千尋。靈蹤斷處人何在。日夕雲霞望轉深。禪藻集。

雲知

雲知西湖普福院僧。

鄴公菴歌

呼猿澗西藏石筍。丹桂蒼松達鷺嶺。幾年陳迹絕纖埃。一旦佳名出清景。山家時喜來五馬。相攜款曲空岳下。途許誅茅結小菴。異日功成伴瀟灑。菴成可以資靜觀。目前直見江湖寬。鄴公政簡每頻到。試茶笑傲浮雲端。物外似忘軒冕貴。此中深得林泉意。野人陪著病維摩。游息自同方丈地。芳猷從此流千載。且

得而今光勝旣

咸淳臨安志。普福院。天福二年。吳越王建。舊名資嚴。大中祥符元年。改今額。有石筍白沙泉。熙寧元年。諫議大夫祖無擇。出守于杭。愛石筍之勝。僧靈知結草爲菴。取公封國以鄴爲名。有歌。

宋詩紀事卷九十二

錢唐厲鶚
吳震生
勘定

景淳

景淳元豐初桂林僧

冷齋夜話景淳居豫章乾明寺終日閉門不置侍者一室淡然聞鄰寺齊鐘即造焉坐
同海衆食堂前飯罷徑去諸刹皆敬愛之或陰雨則諸刹爲送食住二十年如一日

絕句

夜色中旬後虛堂坐幾更臨溪猿不叫當檻月初生
後夜客來稀幽齋獨掩扉月中無事立草際一螢飛冷齋夜話

句

捲箔西風起乘時上古臺秋聲隨葉下夜色帶煙來憶口上人
漁翁睡重春潭闊白鳥不飛舟自橫寄象敦歷代吟譜

元照

元照字湛然號安忍子餘杭唐氏子元豐中住靈芝寺賜諡大智律師

白雲菴

道人倦逢迎。結菴就巖穴。靜愛山頭雲。空濛如積雪。隨風亦卷舒。觸石更明滅。卻憶古人詩。祇可自怡悅。
宋高僧詩選

克文

克文字雲菴。閩鄉鄭氏子。黃龍南禪師法嗣。元豐中賜號真淨大師。有雲菴語錄。

雲鶴

日過晚應宿。山堂任去留。孤雲能自在。隻鶴更優游。柳栗開青眼。袈裟伴白頭。未明西祖意。萍迹謾悠悠。
雲菴語錄

弔黃龍和尚塔

示滅師何速。空遺塔此中。僧閑四海錫。誰復九年風。鳥外千峯遠。人閒一徑通。寥寥朝與暮。唯有白雲同。
禪源集

僧孚

僧孚號草堂。慧聚寺僧。

仲殊喜作豔詞。以詩箴之。

大道久凌遲。正風還彫墜。無人整頽綱。目亂空傷悲。卓有出世士。蔚爲人天師。天章通造化。動與王公知。囊括十洲香。名翼四海馳。肆意放山水。灑脫無羈縻。雲輕三事衲。瓶錫天下之。詩曲相閒作。百紙頃刻爲。

藻思洪泉瀉，翰墨清且奇。惜哉大手筆，胡爲弄柔詞。願師持此才，奮起革澆漓。鴛彼東山嵩，圖祖進豐碑。再續輔教編，高步凌丹墀。他日僧史上，萬世爲善龜。迦葉聞琴舞，終被習氣隨。伊余浮薄人，贈言增忸怩。儻能循我言，佛日重光離。中夢紀聞。

惟一

惟一、法眼之孫。神宗命主嘉禾天寧寺。

雁蕩山

四海名山曾過目，就中此景難圖錄。山前向見白頭翁，自道一生看不足。雁山志。

了元

了元，字覺老。饒州浮梁林氏子。少出家，住持江州之開先，潤州之金山，杭州之聖水等寺。東坡與之往還，神宗賜號佛印。元符初，聽客語合心，一笑軒渠而化。

答可遵

打睡禪和萬萬千，夢中趨利走如煙。勸君抖擻修禪定，老境如蠶已再眠。冷齋夜話。

游雲門

一陣若邪溪上雨，雨過荷花香滿路。拖筇縱步入松門，寺在白雲堆裏住。老僧卻笑尋茶具，旋汲寒泉煮玉乳。睡魔驚散毛骨清，坐看秦峯秋月午。月明山鳥亂相呼，松杉竹影半窗戶。令人徹曉憶匡廬，作詩先寄江南去。雲門集。

三詔洞

疇昔先生此掩關。紫泥三到石房閒。若教便逐蒲輪起。安得清風鎮海山。鎮江府志。

奉忠

奉忠蜀僧。

夏雲

如峯如火復如綿。飛過微陰落檻前。大地生靈乾欲死。不成霖雨漫遮天。

冷齋夜話。章子厚謫海康。過貴州南山寺。奉忠自眉山來。欲渡海見東坡。不及病于此寺。子厚宿山中。邀與飲。忠忻然從之。又勸食蒸蛇。忠舉筋啖之。無所疑。子厚笑曰。奉佛教。乃食蒸蛇。何哉。忠曰。相公愛人以德。何必見誚。已而倚檻看雲。子厚曰。夏雲

多奇峰。真善比類。忠曰。曾記夏雲。

詩甚奇。子厚使誦之。忠誦云云。

清外

葛洪丹竈

羽客昔眷此。鍊液奪化功。至今寒雲色。挂樹復凝空。宋高僧詩選。

繼興

寄四明教主

修真依淨社。幽致絕纖埃。盡日冥心坐。諸方學者來。杉松圍講石。猿鳥立生臺。卻憶重游處。扁舟泛月回。

宋高僧詩選

遇昌

上法智大師

雨霽遙空木落時。危亭南望倍依依。白蓮舊社人離久。丹闕經年信去稀。入觀夜堂江月滿。揮松秋殿晝燈微。林中自有吾廬在。請益終期海上歸。宋高僧詩選

法平

北固山

不負南徐約。來看北固雲。金焦兩山小。吳楚一江分。雨意生蒼壁。潮聲起夕曛。半生流落恨。此日重殷勤。宋高僧詩選

慶老

句

交情老去淡如水。病骨秋來瘦似松。詩說雋永

淨端

淨端字明表。歸安丘氏子。肄業吳山解空講院。參龍華齊岳禪師得悟。翻身作狻猊狀。叢林號爲端師子。章申公極愛之。有吳山集。

山居

吳山古寺近溪邊。高閣虛堂景象全。林下寂寥爐火盡。未眠猶聽夜行船。曹氏歷代詩選。

有朋

有朋、閩帥陳巖六世孫。號困山禪師。有螺江集。

天開巖

棲霞山後峯。天開一巖秀。中有坐禪人。形容竹柏瘦。飢餐巖上松。渴飲巖下溜。愛步巖室前。白雲起孤岫。四朝詩。

善權

善權、字巽中。靖安高氏子。人物清羸。人目爲瘦權。落魄嗜酒。詩入江西派。有真隱集。

西清詩話。權

詩得之清淡。

後村詩話。善權詩。

輿祖可相上下。

王性之得李伯時所作歸去來圖。并自書淵明詞。刻石於琢玉坊。爲賦長句。

王郎言語妙天下。眉宇清揚聚風雅。道山延閣歸有時。吐霧珠綃已無價。乃翁勳業誰與儔。惠愛宛同陳太丘。胡牀夜據興不淺。江波漲月明江樓。鄴侯牙籤三萬軸。玉川五千貯枯腹。掌上雙珠照戶庭。人閒爽氣侵眉目。愛君義獻來仍昆。草聖眞行事逼真。是家此癖古不少。奇書異畫元通神。龍眠解說無聲句。時

向煙雲一傾吐。戲拈秃筆臨冰紈。寫出淵明賦歸去。林端飛鳥倦知還。陌上征夫識前路。因君勒石柴桑里。便覺九原人可起。廬山未是長寂寥。挽著高風自君始。

仁老湖上墨梅

會稽有佳客。邁軸媚考槃。軒裳不能榮。老褐圍歲寒。婆娑弄泉月。松風寄絲彈。若人天機深。萬象回筆端。湖山人道眼。島樹縈微瀾。幻出隴首春。疎枝綴冰紈。初疑暗香度。似有危露溥。縱觀煙雨姿。已覺齒頰酸。乃知淡墨妙。不受膠紛殘。爲君秉孤芳。長年配崇蘭。

送墨梅與王性之

道人筆下有春色。寫出江南雪壓枝。千里持來煩驛使。暗香不減隴頭時。眼底春光回隴首。雪中疎影落平湖。政須送與王摩詰。對看輞川煙雨圖。以上聲畫集。

山中秋夜懷王性之

風雨一葉秋。北窗夜初永。候蟲鳴空階。蝙蝠挂藻井。龕燈照癡坐。苔壁印孤影。試觀鼻端白。僣了虛幻境。萬事皆浮休。百年政俄頃。學詩寒山子。造語少機警。故人王文度。襟韻獨秀整。開蒙吐佳句。惠好灼衰冷。何當翳華芝。飛步越林嶺。攜手剝荆薪。歡言饌湯餅。長嘯凌紫煙。同升妙峯頂。

洪井

木發香城源。度澗隨曲折。奔流兩岸腹。洶涌雙石闕。怒翻銀漢浪。冷下太古雪。跳波落丹青。勢盡聲自歇。散漫歸平川。與世濯煩熱。飛梁瞰虛碧。洞視竦毛髮。連峯翳層陰。老木森羽節。洪厓古仙子。鍊秀擣殘月。

丹成已蟬蛻。藥臼見遺烈。我亦辭道山。浮杯愛清絕。攀松一舒嘯。靈風披林樾。尙想騎雪精。重來飲芳潔。
以上宋高僧詩選

祖可

祖可字正平。丹陽人。蘇伯固之子。養直之弟。住廬山。被惡疾。人號癩可。詩入江西派。有東熙集。瀑泉集。

西清詩話。可詩得之雄爽。如清霜翠木落。盡見西山秋。又谷口未斜日。數峰生夕陰。皆佳句也。

劉後村詩話。祖可嚙讀書。詩料

多無蔬筍氣。僧中一角麟也。

江西宗派圖錄羅源陳善曰。余與僧惠空論今之詩僧。如病可瘦樞。嫌其太清。李商老云。可詩句句是廬山景物。意亦以太清爲病。余謂清非詩之病也。可師有亂山爭夕陽之句。善樞歎其精絕。與養直唱和真隱詩。如漱壑夜泉響。墀窗春霧空等詠。往

往得意

外警妙

天台山中偶題

偏步入蘿徑。綿延趣深。僧居不知處。髣髴清磬音。石梁邀屢度。始見青松林。谷口未斜日。數峯生夕陰。凄風薄喬木。萬竅作龍吟。摩挲綠苔石。書此慰幽尋。
苕溪漁隱叢話

李伯時作淵明歸去來圖。王性之刻于琢玉坊牆。病僧祖可見而賦詩。

坐上柴桑墟落煙。眼中百里舊山川。候門稚子似無恙。三徑巾車人絕憐。尚友當須今逸少。丹青寧復老龍眠。流傳匪獨遺怡玩。端使懦夫懷凜然。

書秦處度所作松石

憐君作詩自無敵。遊戲詩餘畫成癖。高堂奮袖風雨來。霜幹雲根動秋色。長懷祝融天柱峯。萬年不死之喬松。觀君此畫已無數。不復望雲支瘦筇。

觀壯輿所藏伯時馬

平生徒說追風足。厭見駑駘飽芻粟。劉侯爲出二馬圖。緬想權奇在坰牧。本朝不伐大宛城。公初得之無乃驚。胡沙燕山在吾目。短草落日低邊明。雄姿忽作風動壁。意氣騰驤欲無敵。前者驕矜後者馳。信矣能先鳥飛疾。圉人亦復神超然。亮作俗肉勤加鞭。吁嗟駿骨世多有。伯樂不逢長棄捐。以上體畫集

絕句

坐見茅齋一葉秋。小山叢桂鳥聲幽。不知疊嶂夜來雨。清曉石楠花亂流。詩人玉屑

廬山十八賢

不能晉室扶傾覆。盡作西方社裏人。豈意一時希有事。翻令元亮兩眉顰。樂邦文類

秋屏閣

袖手章江淨渺然。倚風殘葉舞翩翩。霜鷗睡渚白勝雪。霧雨含沙輕若煙。楊柳一番南陌上。梅花三弄遠雲邊。匣鳴雙劍忽生興。我欲因從東去船。南昌府志

句

懷人更作夢千里，歸思欲迷雲一灘。懷蘭江窗開一榻篆煙碧，門外四山秋葉紅。贈端師

韻語陽秋：祖可詩多佳句，皆清新可喜。徐師川作畫虎行，末章云：意昔子頑少小時，先生教誦荆公詩，即今老舊無新語，尚有廬山祖可師。

如璧

如璧本撫州士人，饒節字德操，後爲僧，詩入江西派。有倚松老人集。

墨莊漫錄：如璧少時曾投書于曾子宣，論新法非是，不合，乃視髮更名。尤長于詩，有詠梅云：遂教天下無雙色，來作人間第一春。風味不淺。

能改齋漫錄：饒德操自號倚松道人，取

閑禪師詩云：故以名菴，又以自號。

劉後村詩話：如璧

詩輒快似謝無逸。

撫州府志：僧如璧，饒氏臨川人，初名節，字德操，博學能文。後之穀城香嚴寺，聽智海說法而悟，遂落髮。陳瑩中與詩云：舊時饒措大，今日璧頭陀。借問安心法，儒禪隔幾何。先是如璧有偈云：閑攜經卷倚松立，試問客從何處來。因號倚松道人。

寄呂居仁

向來相約濟時功，大似懶伽餉遠空。我已定交木上座，君猶求舊管城公。文章不療百年老，世事能排雙頰紅。好貨夜窗三十刻，胡牀趺坐究幡風。

紫微詩話德操詩蕭散不減潘
邠老爲僧後詩更高妙不可及

偶成

松下柴門晝不開。只有蝴蝶雙飛來。蜜蜂兩脾大如繭。應是山前花又開。

李太白畫歌

先生之氣蓋天下。當時流輩退白舍。醉中咳唾落珠璣。身後聲名滿夷夏。青山木拱三百年。今晨乃拜先生畫。烏紗之巾白紵袍。岸巾攘臂方出遨。神遊八極氣自穩。冰壺玉斗霜氣高。嗚呼先生態絕倫。仙風道骨語甚真。蕭然可望不可親。懸知野鶴非雞羣。天寶之初天子逸。先生辭去不肯屈。采石江頭明月出。鼓棹酣歌志願畢。只今遺像粉墨閒。尙有英風爽毛骨。宣州長史粉黛工。誰令寫此人中龍。細看筆意有俯仰。妙處果在阿堵中。人云此畫世莫比。吳侯得之喜不寐。意侯所愛豈徒爾。亦惜真才死泥滓。先生朽骨如可起。誰爲獵之奉天子。作爲文章文聖世。千秋萬古誦盛美。再拜先生淚如洗。振衣濯足吾往矣。

題宗子趙明叔盤車圖後

跌宕平生萬里程。盤車一展老心驚。溪昏樹老牛爭力。似聽當年風雨聲。

贈道士張謙中

道人髭鬚似民部。平生篆隸心獨苦。世間筆墨一點無。駸駸氣象追千古。道人得師在何許。秦漢鼎彝周石鼓。若嶧山碑若詛楚。二李而下初不數。異時心醉不窺園。依繩作直規作圓。一朝妙解古人意。脫落尺

度誠其天。嗟君絕藝世無敵。勿示時流渠未識。我亦當年好古人。推席爲君三歎息。

歎息行有序

士大夫湛于不義。雖窮極富貴。君子過之弗顧。而況女子失身于委巷。容笑之賤。亦豈能自拔哉。吾友人賦歎息行。有謂而作。誰人既屬和。僕亦擬古樂府爲辭。傷之于其末。開之以正。是亦詩人之志也。歎息復歎息。丹砂爲土玉爲石。誰家女兒妙無敵。日日當窗淚霑鳥。問之何思復何憶。深顰欲語語不得。回身抱琴不背面。清商自寫昭君怨。朔風蕭蕭霜月懸。萬里胡沙鳴一雁。此聲此意太分明。猶恐君侯未會情。從頭卻欲爲君說。恐君腸斷君勿聽。黃鶴一去已千里。雉子高飛亦能幾。人生長短要自裁。嗟爾此身今已矣。刺刺促促徒爲爾。

寄夏思道惠示縑帛

憶昔南方木葉下。祝融逗留不退舍。閭閻未簡卒歲材。明月滿門自宜夜。而今身在天中央。日月寒暑遵故常。西風今日我爲政。冥冥塵沙何可當。浮雲倚勢不解事。濃陰蔽日釀秋思。臥病但知仲卿泣。載酒誰問子雲字。故人千里知我寒。書來遺我帛數端。揀絲織作經緯稱。長細廣幅尺度寬。染人暴練勿設色。衣被皎皎識君德。以上倚松集

題骨觀畫

白骨纖纖巧畫眉。燭骸楚楚被羅衣。手持紈扇空相對。笑殺傍觀自不知。墨莊漫錄

答呂居仁寄詩

長憶吟時對短檠。詩成重改又雞鳴。如今老矣無心力。口誦君詩遠竹行。

墨莊漫錄此詩

居仁甚稱之。

如琳

如琳如璧之僕。後爲僧。

梁溪漫志。饒節字德操。臨川人。以文章著名。曾子宣丞相禮爲上客。陳了翁諸公皆與之游。往來襄鄧間。始亦有婚宦意。遇白崖長老。與之語。欣然有得。嘗令其僕守舍。歸見其占對異常。怪而問之。僕曰。守舍無所用。心聞鄰寺長老有道。價往請一轉語。忽覺悟。身心泰然。無他也。德操慨然曰。汝能是我。乃不能。何哉。徑往白崖問道。八日而悟。盡發囊囊。與其僕視髮爲浮屠。德操名如璧。僕名如琳。徧參諸方。陳了翁。關子開兄弟。皆以詩稱美之。至江浙。樂靈隱山川。因挂錫。琳抱疾。德操躬進藥餌。既卒。盡送終之義。後主襄陽天寧。夏均父倪爲請疏。其略云。無復挾書更逐康成之後。何憂成佛。不居靈運之先。又云。豈惟江左公卿。盡傾支遁。獨有襄陽耆舊。未識道安。時稱其精。

韜光菴訪淵公不值。日瑄按此詩又見倚松集。

紫巖伸拳筍。破梢楊花飛。盡綠陰交。道人開戶不知處。黃栗留鳴鵲在巢。咸淳臨安志。

惠嚴

惠嚴。姓彭氏。金谿人。出家寶應寺。號文惠大師。

遊廢圃

亭榭基猶壯。笙歌迹已陳。竹分通別徑。花發屬南鄰。雲散望塵友。冰銷炙手人。只因忘寵辱。到此不傷神。

宋高僧詩選

正覺寺

野水痕俱落，擎舟日未西。斷溝橫略約，支徑入招提。方廣原深似，竹林境可躋。徘徊未能返，暝色起前谿。

撫州府志：韓陵陽駒客雲寶應寺，每賦詩，師從旁諦聽。韓曰：須吟盡齋惡，而後可施。錯縫，自是有能詩聲。鄉人李侍郎浩時爲中都官朝士，問斷溝橫略約，支徑入招提，此臨川惠嚴上人詩。耶李曰：是特虎豹一斑耳。

法具

法具字圓復，吳興僧，後寂于毘陵馬跡山，有化菴湖海集。

容齋三筆：圓復有能詩聲，于福州僧智恢處見其詩藁一紙，字體效王荆公，其詩皆可咀嚼也。

送僧

灘聲嘈嘈雜雨聲，舍北舍南春水平。拄杖穿花出門去，五湖風浪白鷗輕。

送翁士特

朝入羊腸暮鹿頭，十三官驛是荊州。具車秣馬曉將發，寒燭燒殘語未休。

竹軒二首

老竹排簷誰手種，山日未斜寒翠重。六月散髮葉底眠，冷雨斜風頻入夢。冬凋峯木雪縞廬，落眼青青卻笑渠。花時吹笛排林上，吳州還見竹溪圖。

和子蒼三馬圖

從來畫馬稱神妙。至今只說江都王。將軍曹霸實季仲。沙苑丞相猶諸郎。龍眠居士善畫馬。獨與二子遙相望。兩馬駢立真驢驢。一馬脫去仍騰驤。浣花老人今已亡。嗚呼五馬誰平章。飽知畫肉亦畫骨。妙處不減黃無雙。

絕句春日

燒燈過了客思家。獨立衡門數暝鴉。燕子未歸梅落盡。小窗明月屬梨花。以上容齋三筆。

客中會友

愁中有句可消除。客裏無人問所須。竹屋青燈雨聲冷。白頭相對話江湖。

東山

窗中遠看眉黛綠。盡是當年歌吹愁。鳥語夕陽人不見。薔薇花暗小江流。以上宋高僧詩選。

月夜遊錢唐江

小舟爲我載月色。白沙翠竹光相射。自從李白下金陵。四百年無此豪逸。見攻媿集。

題默齋

在富陽華蓋仙山院。

道人挂口蒼煙裏。萬象無聲忽轉雷。老去不知塵世事。東風又上屋頭梅。咸淳臨安志。

曇瑩

曇瑩嘉禾僧。號羅月。善言易。洪邁容齋續筆稱爲易僧。

睡起

薰帳煙凝晝掩關。落花時節雨闌珊。客來驚起還鄉夢。繞屋春風綠樹寒。

姚江

沙尾鱗鱗水退潮。柳行出沒見漁樵。客船自載鐘聲去。落日殘僧立寺橋。以上宋高僧詩選。

希雅

寄禮導師

掩關名自遠。鯨浪阻相尋。講罷唯澄慮。孤峯祇此心。柏煙秋榻靜。蓮漏夜堂深。盡仰鄞江上。清風繼道林。宋高僧詩選

士珪

士珪住温州龍翔寺

觀行上座所作維摩問疾圖

道人耽耽癡虎頭。瞭然電轉開雙眸。枯木已死寒巖秋。定中霹靂摧四牛。起來下筆不能休。新詩字字蟠銀鉤。發其餘者漫不收。散而縱橫爲九流。我觀此畫真其尤。病維摩詰小有瘳。文殊大士從之游。彼上人者難對酬。兩公文章虎而彪。萬古凡馬空驂驪。向來曹韓與韋侯。筆端亦嘗知此否。世閒畫本多山丘。閱人何翅如傳郵。對此可以銷百憂。先生胡爲吟四愁。

安上座所作墨梅

道人色心淨，了見造物根。筆端開此花，胸中有丘園。清香凝暗夜，疎枝臥黃昏。撞鐘西湖寺，見月羅浮村。老眼隔煙霧，一笑作籬藩。以上聲畫集。

蘊常

蘊常字不輕。

送空上人

過了梨花春亦歸，小窗新綠正相宜。白頭更作西州夢，細雨青燈話別離。

別蘇養直

老去難爲別，愁邊更著秋。碧蘆圍野水，落日滿行舟。雁斷西風急，天寒古寺幽。兩鄉無百里，能寄短書不。以上宋高僧詩選。

德葵

德葵華亭僧。

題海慧寺畫水壁

君不見昔人十日畫一水，摩挲窪窿隨手起。若非胸次吞江湖，安得波瀾來筆底。我來蕭寺觀奇蹤，壁間隱隱騰蛟龍。初疑乘風馭弱水，恍然坐我蓬萊宮。又疑去年八月秋水溢，陰風襲人廊廡溼。誰知畫者巧通神，董羽至今羞死筆。此水不是畫一水，一水一水勢相及。對此融神坐終日，後人雖畫畫不出。何如倒卻毘陵華嚴壁，海慧北廊推第一。松江府志。

善勤

洛下別同志

歲暮遠交朋。攜筇背洛城。往來興廢地。今古別離情。疊翠嵩峯色。瀉寒伊水聲。他年再相會。卻訝白髭生。

宋藝圃集

惠日

題三女岡白蓮花

神佛何由測。芬陀陸地興。素芳呈玉雪。梵刹肇丘陵。換額從師霸。懸碑自老僧。殷勤勸來者。期使續千燈。

至元嘉禾志

懷志

懷志金華吳氏子。游湘上。菴于南嶽石頭二十餘年。崇寧初入滅。

答覺範問住山

山中住。獨掩柴門無別趣。三箇柴頭品字煨。不用援毫文彩露。

萬機俱罷付癡憨。蹤跡常容野鹿參。不脫麻衣拳作枕。幾生夢在綠蘿菴。

林間錄

智孜

智孜號禪鑑。俗姓蕭。長汀僧。

四皓

忠義合時難。雲林共掩關。因秦生白髮。爲漢出青山。不顧金章貴。常披鶴氅還。如今聖明代。高躅更難攀。

汀州府志洪駒父

見此作擊節稱賞

法秀

法秀字圓通。秦州隴城人。辛氏子。受法無爲懷禪師。道風峻潔。時目爲秀鐵面。冀國大長公主請師住法雲寺。元祐五年說偈而化。

僧寶傳李伯時工畫馬師呵之曰汝畫馬期人誇以爲得妙入馬腹中亦足懼伯時由是絕筆師勸畫觀音像以贖其過黃魯直作豔詞人爭傳之師呵之曰翰墨之妙甘施于此乎魯直笑曰又當置我馬腹中邪師曰汝以豔語動天下人淫心不止馬腹正恐生泥墮中耳

頌子

誰能一日三梳頭。撮得髻根牢便休。大抵是他肌骨好。不搽紅粉也風流。侯鯖錄

送僧遊嘉禾

楚天西首路。橋李記曾遊。店宿燈懸夢。隄行草喚愁。玉澄湖水曉。畫展園亭秋。小艇枯楊趾。重來爲繫留。
翰墨天全

普首座

普首座蜀僧自號性空菴主。

別衆一絕

船子當年返故鄉，沒蹤跡處妙難量。真風偏繼知音者，鐵笛橫吹作散場。

羅湖野錄。普首座參見死心禪師居華亭最久。雅好吹鐵笛。放曠自樂。凡聖莫測。亦善爲偈。旬開導人。旣而欲追船子和尙故事。遂于青龍江上乘木盆。張布帆。吹鐵笛。泛遠而沒。

懷清

懷清號草堂。住隆興府泐潭。

送崇覺空禪師

十年聚首龍峯寺。一悟真空萬境閑。此去隨緣且高隱。莫將名字落人間。羅湖野錄。

圓禪師

圓禪師住湖州甘露寺。

漁父詞

本自瀟湘一釣客。自東自西自南北。只把孤舟爲屋宅。無寬窄。幕天席地人難測。
頃聞四海停戈革。金門嬾去投書策。時向灘頭歌月白。真高格。浮名浮利誰拘得。羅湖野錄。

正勤

落葉

蕭索下疎林，翩翩動客心。帶煙浮遠水，和露逐飛禽。近砌凋將盡，前村疊更深。年年見衰謝，看卽二毛侵。
宋高僧詩選

靈源

靈源早參晦堂，號清侍者。

辭張無盡，請住豫章觀音寺。

無地無錐徹骨貧，利生深媿乏餘珍。鄺中大施門難啓，乞與青山養病身。

羅湖野錄：黃魯直與興化海老手帖云：承觀音虛席，上司有意于清兄，清兄確欲不行，亦甚好。蟠桃三千年一熟，莫做退花杏子摘卻。此事黃龍興化亦當作助道之緣，共出一臂，莫送人上樹拔卻梯也。

懷悟

懷悟字瑞竹，禦溪崔氏子。

廬山白蓮社

晉室陵遲帝紀侵，羣英晦跡匡山陰。樓煩大士壓塵尾，十七高賢爭扣几。才高孰謂文中龍，返使伊人思謝公。煙飛露滴玉池空，雪蓮蘸影搖秋風。
樂邦文類

昭符

秋夕

又是聽猿吟，如何恨更深。每因多病日，減卻少年心。凍鶴連巖雪，愁人半夜砧。故園阻兵革，消息遣誰尋。

宋高僧詩選

義了

義了字廓然嵩山僧

句

百年休問幾時好萬事不如明日看許彥周詩話

正宗

正宗俗姓陳崇仁人居梅山呂居仁曾吉甫韓子蒼寓臨川日宗遊其門有愚丘詩集

觀孫司戶畫壁

若人胸次閒能容書四庫餘地著山川得酒欲飛去摩挲雪色壁吐作無聲句寒屯水際雲瘦立煙中樹
雖非桃花源亦自有佳處未休蝸角兵欲問樵蘇路祇恐山中人笑我來何暮

次韻蘇堅老秋日登擬峴臺

秋容澹薄晚煙孤千里誰開水墨圖欲借扁舟乘興去臥看月影弄風蒲以上宋高僧詩選

招福寺作

自顧不材同社櫟乘流得坎便爲家體中不快思讀易睡思欲來還煮茶撫州府志

泉禪師

泉禪師蔣山僧號佛慧叢林謂之泉萬卷

送東坡居士

脚下曹溪去路通。登堂何復問旛風。好將鍾阜臨歧句。說似當年踏碓翁。

羅湖野錄。紹聖元年。東坡居士有嶺外之行。舟次金陵。阻風江。潛泉公迎至。從容語道。東坡以詩紀其事。泉公復說偈送行。

信禪師

貽老僧

俗臘知多少。龐眉擁毳袍。看經嫌字小。問事愛聲高。曝日終無厭。登階漸覺勞。自言曾少壯。游嶽兩三遭。

羅湖野錄。蘇州定慧信禪師。爲明眼宗匠。此乃其游戲耳。然品題摹寫。可謂曲盡矣。

知和

知和、岷山張氏子。元符閒住雪竇。

題壁

竹筧兩三升野水。窗前五七片閑雲。老僧活計只如此。留與人閒作見聞。
黃皮裹骨一常僧。壞衲蒙頭百慮澄。年老懶能頻對客。攀蘿又上小峻嶒。

羅湖野錄。明州和菴主。居雪竇之棲雲菴。有志于道者。多往見之。主者嫉其勝。已。因郡守周舍人聞其名而問之。對曰。一常僧耳。和題偈于壁。徙居杖錫山。

顯萬

顯萬字致一。涪溪僧。嘗參呂居仁。有涪溪集。

曉發山店

麝食小人家。寒燈碎落花。雞鳴窗半曉。路暗月西斜。世故欺懷抱。風霜迫歲華。劇憐詩思苦。悽惻向長沙。

送炭與湘山西堂惠禪師

紛紛向火乞兒多。獨有君如擇乳鵝。萬煨爐中尋粲可。一堆灰裏撥陰何。雪欺敗屋閑犀柄。草臥空庭任雀羅。頭送烏薪相暖熱。恐隨春夢入南柯。以上宋高僧詩選。

菴中自題

萬松嶺上一閒屋。老僧半閒雲半閒。三更雲去作行雨。回頭方羨老僧閑。詩人玉屑。

義帝陵

祖龍智昏日月蝕。南公力欲麒麟鬪。楚雖三戶必亡秦。盛德宜然有其後。魯公背約火咸陽。咄嗟聲出羣。雄右豆分瓜。剖聽指頤。忍使黥徒賊。孤幼籍也。狐埋狐搯之。項伯寧不爲家寇。真人如龍翔。霸上縞袒長風起。襟袖終據黃圖。豈力爲雅張。赤幟皆天授。可憐郴北東上墳。恨碧淒紅春不茂。

蘇仙宅

蘇君善養志。以孝格神明。一朝蛻塵鞅。通籍赤霞城。相看疑夢寐。去若鵝毛輕。玉笙墮哀響。煙鬢錯霓旌。丹井愈沈疴。橘葉通仙靈。至今華屋底。想像雙眉青。雲裝挹飛袖。綦佩敲風鳴。茲事旣茫邈。無階接蓬瀛。

掬月漱吟齒，餐霞壽頽齡。蘊真思遠託，何從保長生。漢武梓棺巧，秦皇鮑魚腥。空山鶴未歸，花發春冥冥。
彬陽道中

草荒驛路欲迷人，未見梅花信息真。憶著舊家煙雨外，犯寒斜放竹籬春。
曉村寒水碧悠悠，雨歇浮雲漫不收。且緩晨炊三十里，不妨亭午到彬州。以上彬州文志。

圓璣

圓璣，福州林氏子。元祐閒住洪州翠巖寺。崇寧初，住金陵保寧寺。

答張無盡因續成詩。

野僧迎客下煙嵐，試問如何是翠巖。張商英門近洪崖千尺井，石橋分水繞松杉。璣羅湖野錄。

書壁

無學菴中老，平生百不能。忖思多幸處，至老得爲僧。

僧寶傳：璣雅自號無學。老而書偈于壁云：宣和中詔下髮，天下僧尼爲德士德女而璣已化去，豈偶然哉。

惠洪

惠洪，字覺範，俗姓彭，筠州人。以醫識張天覺，大觀中入京，乞得祠部牒爲僧。又往來郭天信之門。政和元年，張郭得罪，覺範決配朱崖。有石門文字禪，筠溪集，天廚禁巒，冷齋夜話。

能改齋漫錄。洪覺範有上元宿嶽麓寺詩。蔡元度夫人王氏荆公女也。讀至十分春瘦。緣何事。一掬鄉心未到家。曰此浪子和尙耳。

雪浪齋日記。覺範詩云。已收一霎挂龍雨。忽起千巖灑鶴風。挂龍雨對灑鶴風。皆方言。古今人未嘗道。又云。麗句妙于天下。白高才俊似海東青。又云。文如水行川。氣如春在花。皆奇句也。

舟行書所見

剡水殘山慘淡閒。白鷗無事小舟閑。箇中著我添圖書。便是華亭落照灣。

冷齋夜話。魯直謂予曰。觀君詩說。煙波縹緲處。如陸

忠州論國政。字字坦夷。前身非篙師沙戶種類耶。

陳瑩中移家廬山

雁蕩天台看不足。盡搬兒女寄篷窗。往來漳水謀二頃。偶愛廬山家九江。名節適真如醉白。生涯領略似湘龐。向來萬事都休理。且聽樓鐘咽夜撞。與公靈鷲曾聽法。遊戲人閒知幾生。夏口甕中藏畫像。孤山下認歌聲。翳消已覺花無蒂。礦盡方知珠自明。煙柳夕陽殘雨外。一番飛絮滿江城。

冷齋夜話。余還自朱崖館于高安大愚山。陳瑩中自台州載其家來漳浦。過九江。愛廬山。因家焉。以書督余兼程來。余以三日。至湓城。瑩中曰。自此公可禁作詩。無益于事。余曰。敬奉教。然余兒時好食肉。母使持齋。余叩頭乞先飽。餐肉一日。母許之。今日當準食肉例。先吟兩詩。喜吾二人死而更生。如何。瑩中許焉。詩成。瑩中喜而謂余曰。此岐山豬肉雖美。無多食。後三年。余客漳水。見瑩中姪勝柔。自九江來。出示余詩。余謂勝柔曰。公擬叔詩如食鱖魚。惟恐遭骨刺。與岐山豬肉不可同年而語也。

余自并州還故里。館延福寺。寺前有小溪。風物類斜川。兒童時戲劇之地也。春深獨行溪上。因作小詩。一作筠溪晚望。

小溪倚春漲。攘我釣月灣。新晴爲不平。約束晚見還。銀梭時撥刺。破碎波中山。整鉤背落日。一葉嫩紅閒。崇勝寺後有竹千餘竿。獨一根秀出人呼爲竹尊者。因賦詩。

高節長身老不枯。平生風骨自清癯。愛君修竹爲尊者。卻笑寒松作大夫。未見同參木上座。空餘聽法石於菟。戲將秋色分齋鉢。抹月批風得飽無。

能改齋漫錄。黃太史見之。喜因手書此詩。故名以顯。

謁狄梁公廟

九江浪黏天。氣勢必東下。萬山勒回之。到此竟傾寫。如公廷諍時。一快那顧藉。君看洗日光。正色甚閑暇。使唐不敢周。誰復如公者。古祠蒼煙根。碧草上屋瓦。我來春雨餘。瞻歎香火罷。一讀老范碑。頓塵看奔馬。斯文如貫珠。字字光照夜。整帆更遲留。風正不忍挂。

汪履道家觀所蓄煙雨蘆雁圖

西湖漠漠生煙雨。浦浦圓沙鳧雁聚。今日高堂素壁閒。忽見西湖最西浦。翩翩兩雁方欲下。數隻飄然掠波去。獨餘一隻方穩眠。有夢不成亦驚顧。蕭梢碧蘆秋葉赤。青沙白石紛無數。我本江湖不繫舟。爾輩況亦江湖侶。令人便欲尋容郎。呼船深入龍山塢。

西齋畫臥

餘生已無累。古寺寄閑房。睡足無來客。窗空又夕陽。叢蕉高出屋。病葉偶飄廊。起探風簷立。飛蟲鬧晚涼。

贈尼昧上人

不著包頭絹。能披壞墨衣。媿無灌溪辯。敢對末山機。未肯題紅葉。終期老翠微。余今倦行役。投杖夢煙扉。

以上石門文字禪。

送僧

古寺閑門聊作夏。秋來歸思漫迢迢。枕中柔櫓驚鄉夢。門外秦淮漲夜潮。想見舊房生薜荔。不堪疎雨滴芭蕉。何時卻理緣雲策。同上峯頭看石橋。

夏日

山縣蕭條半放衙。蓮塘無主自開花。三叉路口炊煙起。白瓦青旗一兩家。以上宋高僧詩選。

惠津

句

飢殘夷叔丰姿瘦。泣盡娥英粉淚乾。雙竹。天廚禁鬻。

梵崇

梵崇字寶之。

香泉濟大師見過

老木因風時自號。杜門春徑長蓬蒿。得君過我殊堪喜。夜雨不知山月高。

夜歸

暮策返溪寺。松風遵路長。水幽聲斷續。山暝色蒼茫。鐘隱空巖響。露滋羣草香。歸來人已久。華月半虛廊。

寓居西林

一身雖復嬾。百念勤掃除。衆人自紛擾。我心常晏如。寄茲西林寺。適與靜者俱。流水響環佩。芳林列扶疎。時開南面窗。煙中認香爐。夜梵出遠壑。朝雲生坐隅。高眠謝俯仰。一食隨鐘魚。須知天宇閒。所在皆我廬。何必支上人。賀山纔隱居。以上宋高僧詩選。

觀燕肅山水

憶昨神林口。江山此畫同。沙鷗輕泛浪。浦樹遠含風。一舸菰蒲外。數峯煙雨中。箇中誰得計。蓑笠釣魚翁。聲畫集。

春晚

春光過眼只須臾。榆莢楊花掃地無。卻憶菩提湖上寺。綠荷擎雨看跳珠。合璧事類前集。

沖邈

沖邈政和中。崑山詩僧有翠微集。

翠微山居

一池荷葉衣無盡。數樹松花食有餘。卻被世人知去處。更移茅屋作深居。玉峯詩集。

文 坦

寒食野步

寒食出重闌，郊原忽愴神。人悲新舊冢，花落古今春。名位空標史，賢愚盡委塵。斜陽回首處，壠木噪鴉頻。

宋藝圃集

文 興

寄雲水禪師

百丈傳衣後，棲心近沃洲。道高歸毳侶，名重達凝旒。對話千峯雪，安禪萬木秋。仍聞有新偈，時向四方流。

雲門志略

如禪師

答嵩禪師

道契平生更有誰，閑卿於我最心知。當初未欲成相別，恐誤同參一首詩。

五燈會元

宗 振

宗振、丹丘人，南康雲居寺首座。

題壁

住在千峯最上層，年將耳順任騰騰。免教名字挂人齒，甘作今朝百拙僧。

五燈會元

克 勤

克勤住成都昭覺寺紹興初逝賜諡眞覺禪師。

贈思淨律師并序

錢唐妙行淨律師具佛種智闡普門方便操鐵石身心作種種殊勝佛事三十餘年矣遐邇信向無論識與不識聞見喻彌陀卽傾贊樂施比年設百萬僧齋功過半而青溪巨盜寇攘武林淨公化緣自如賊脅以刃色不動緣此革心爲斂跡泊宣撫公相統天兵掃蕩妖孽錢唐得清平淨目擊之遂發大心於西湖多寶陬區劖石作當來下生彌勒百尺像俾生靈不待三會龍華先覩慈氏作授記荊之因而以報聖君賢相朝貴濟護黎庶丘山之恩琢石鳩工將就能事山僧適以緣邂逅思溪乃述偈贊庶覽者知淨律師惡境界所不能轉而增廣志願知恩報恩卓卓如此宣和六年三月二十日。

百萬齋才了正因大緣條舉只遼巡鑿將瑪瑙一方石鑄作龍華百尺身天竺江山增秀麗西湖風月愈清新色聲不動操能事可是僧中英特人。宋妙行寺志。

顯彬

顯彬字守中俗姓周安吉縣人寶梵寺僧。

新月

微光已成魄隱隱夕陽閒六幘無人卷一鉤長自閑輪隨蟾影長香逐桂枝還三五相將近分明照竹關。
湖州府志。

僧印

僧印、字月江。

周侯祠

將軍手持三尺劍，奮身直入蛟龍穴。至今魚鼈不敢游，溪流上下皆腥血。千年廟食未足酬，問之父老何其憂。害人白額猶未盡，紛紛不獨南山頭。宋藝圃集。

如菴主

如菴主、天台僧。

荅郡守

三十年來住此山，郡符何事到林間。休將瑣瑣塵寰事，換我一生閑又閑。五燈會元。

小南禪師

小南禪師、汀州張氏子，居廬山之羅漢寺。

示居士張戒

頭戴烏巾著白襪，山房借汝一年閑。出門爲說來時路，家在黃幘翠靄間。羅湖野錄。

思淨

思淨、錢塘喻氏子，好畫阿彌陀佛，臻其妙。楊無爲呼爲喻彌陀。就北關僦舍，飯僧及三百萬，移妙行額爲寺，鑄西湖多寶山石爲佛像，紹興七年，趺坐逝。

答或問

平生只解念彌陀。不解參禪可柰何。但得五湖風月在。太平何用動干戈。西湖高僧事略。

懷深
懷深壽春夏氏子。靖康閒住靈巖堯峯院。號慈受禪師。

中秋賞月寄高峯瓊老

靈岫高峯咫尺間。青松長伴白雲閑。今宵共賞中秋月。莫道山家不往還。中吳紀聞。

堯峯院山居十詠存六首

清輝軒

湛湛平湖浸月明。漁歌吹斷曉風清。壞衣蒙頂跏趺坐。不稱詩情稱道情。

碧玉沼

深靜含秋一鑑寬。清甘聊酌齒牙寒。靈巖自笑窮山骨。明月泉慳只欲乾。

多境巖

聊向蒼藤挂六環。滿莎嘉致伴幽閑。雙眸淨洗看不厭。欲結遮頭草一閒。

觀音巖

笑日野花青嶂下。歌春幽鳥白雲閒。寶陀大士全身露。懊惱遊人空看山。

東齋

禪板蒲團消永日。明窗淨几映疎筠。一爐香盡六時過。轉覺山家氣味真。

西隱

匿隱長嫌山未深。閉門莫放俗塵侵。如今滿眼事奔走。欲向何人話此心。以上吳郡志。

慧梵

慧梵字竺卿。住崇德羔羊村澄寂院。有蓬居集。

太湖

黃蘆一股水。翠竹兩三家。落日聞雞犬。荆榛一徑斜。宋高僧詩選。

天月僧以下無名釋子。

答贊寧

山中人事遠。天眼中修定。自注天目一名天眼。吾本無根株。只將筍爲命。筍譜。

村寺僧

蒸豚

鬻長毛短淺含臙。久向山中食藥苗。蒸處已將蕉葉裹。熟時兼用杏漿澆。紅鮮雅稱金盤飮。軟熟真堪玉筍挑。若把羶根來比並。羶根只合喫藤條。

東坡志林。王中令既平蜀。擄逐餘寇。與步隊相遠。飢甚。入一村。寺中主僧醉甚。箕踞。公怒欲斬之。僧應對不懼。公奇而赦之。問求蔬食。僧云有肉無蔬。公益奇之。餽以一豬頭。食之甚美。公喜。問僧止能飲酒食肉耶。抑有他技也。僧自言能詩。公令賦。蒸豚。授筆立成。詩云云。

公大喜。與紫衣賜號。

朱池寺僧

絕句

孤燈寂寂夜堂深。寒雨蕭蕭響竹林。大抵浮生只如此。不須哀怨動悲吟。

李希聲詩話。予往歲侍親睦州壽昌縣。朱池寺僧卒。方數日。弟子出。卒前一日。手寫頌云云。字甚端謹。斯亦異矣。

蜀僧

題東明寺

三十年前鎮益州。紫泥丹詔鳳池遊。大鈞播物心難一。六印懸腰老未休。佐主不能如傅說。知幾那得似留侯。功名富貴今何在。寂寂招提土一丘。

梁溪漫志。蔡元長南遷。道出長沙。卒于城南五里東明寺。遂帥殯于寺之觀音殿後。有蜀僧遊方過之。慨然因題詩于壁云云。

湘僧

題能仁寺

寺在重雲裏。秋深夢轉勞。檻前雙澗急。門外一峯高。谷鳥翻新樂。巖松起暮濤。何時拂衣去。欹枕聽蕭騷。
南岳總勝集。

專

